



ル 5
3048
9



門ル 6
號 3001
卷 9

門ル 8
號 2301
卷 9

門ル 5
號 3048
卷 9

崑新兩縣續修合志卷二十一

名宦

守令之選至宋始重唐以前宦蹟寥寥非特世遠年湮而已凌萬頃云表其可書者使後人慨慕遐想罔俾專美於前實一邑所望蓋謂良吏之難得也茲從舊志參之諸紀載及近今可傳之令佐廣文著名宦

三國吳

顧雍字元歎吳人從蔡邕學琴書州郡表薦為合肥長轉婁縣及曲阿上虞皆有治績遷會稽郡丞黃武四年迎母於吳孫權親臨拜母累官丞相封醴陵侯諡曰肅

宋

崑新兩縣續修合志 卷二十一 名宦 一

昭和九年
六月十八日
購本

祖冲之字文遠范陽薊人有機思解鐘律嘗改何承天厯法姚興指南車造韻器孝武時直華林學省厯公府參軍婁縣令入齊爲長水校尉

宋大觀三年以算學封范陽子從祀孔子廟庭

梁

陸慶吳郡人少通五經尤好左氏春秋節操高介爲婁令以善政聞陳天嘉初徵爲通直散騎侍郎不就太守永陽王聞其名欲與相見辭以疾宗人陸榮爲郡五官掾慶嘗詣之王乃微服往榮宅穿壁觀之謂榮曰慶風神疑峻殆不可測嚴君平鄭子真何以尙茲

何之元廬江瀟人好學有才思天監末司空袁昂表薦之因得召見累遷信義令宗人敬容位通顯頻相過訪之

元終不一造或問其故之元曰德薄位隆覆敗可待吾懼及禍耳識者以是稱之入陳厯湘州刺史

陳

殷不佞字季卿長平人梁尙書郎高明子少立名節居父喪以孝稱好讀書尤長吏術承聖初爲武康令母卒江陵道路隔絕不得奔赴晝夜號泣及歸葬身自負土孝武受禪除婁令後兼尙書左丞加通直散騎常侍卒官

唐

萬齊融越州人爲崑山令神龍中與于休烈賀知章賀朝包融爲文詞之交齊名一時

王綱大厯九年以大理司直爲崑山令政務化民縣故有

文宣王廟其後為學室歲久廢壞至是釋奠於廟諭三老主吏廣闢室宇聚五經其中以邑人沈嗣宗為博士遐邇童冠畢集時以不被儒服為耻邑人梁肅為之記

宋

邊倣華州鄭人諫議大夫珣之從子也太平興國二年錢氏納土倣知吳縣雍熙四年再知崑山循良牧愛政績懋著唐制郡邑皆得置夫子廟自黃巢之亂存者無幾崑山之廟更五代五六年不建而自吳越以來邑令多以武人為之民不知學倣因舊址立夫子廟門闕壯麗狀十哲像於其傍王禹偁為作記自是縣學復興儒風始振太宗聞倣賢行璽書獎勞仕至殿中丞

趙稹字表微宣州人擢進士第歷平定軍判官台州推官改大理寺丞知崑山縣為人誠質寬厚以德化人累官禮部尚書樞密副使拜太子少傅卒諡僖質

梁適字仲賢鄆州須城人翰林學士灝之子少孤嘗輯其父遺文及所自著以進真宗曰梁灝有子矣授秘書省正字天聖初為開封府功曹知府事呂夷簡薦之擢知崑山縣徙知梧州後舉進士歷樞密直學士參知政事為丞相卒贈司空諡莊肅

張方平字安道揚州人

宋史南
京人

少穎悟絕倫宋綬蔡齊以

為天下奇才明道中舉茂才異等為校書郎景祐中知崑山時吳越歸國以後郡邑地曠豪民占田者多積訟

有數十年不決者方平召問所輸租稅幾何大率百纜
 一二乃悉收其羨田以賦貧民而訟亦息侍郎蔣堂為
 郡守得方平所著芻蕘論三十篇上之遂舉賢良方正
 後拜參知政事以太子少保致仕卒贈司空遺令毋請
 諡尚書右丞蘇轍為請諡文定今祠在東南門外
 相沿以土神祀之
 韓正彥字師德安陽人魏忠獻王琦從子嘉祐中知崑山
 縣以靜治之囹圄數空創石隄疏斗門作塘七十里以
 達於郡人不病涉得膏腴田數百頃又請以輸州之賦
 十三萬從便輸縣鳩作塘餘材為倉廩以儲之民大悅
 以最聞比去遮道以留立生祠作思韓記鑿石祠下
 錢勰字穆父會稽人吳越王侗之曾孫熙寧三年中秘閣

選廷對入等會王安石罷其科以蔭知尉氏移知崑山
 入為中書舍人給事中知開封府以不避豪貴出知越
 州哲宗朝翰林缺學士命勰兼侍讀為章惇所詆罷知
 池州元符末追復龍圖閣學士

沈遼字獻達錢塘人翰林學士邁之弟也自幼不羣長益
 好學為崑山令受知王安石及安石當國遼為審官西
 院主簿論事不合罷去久之以太常奉禮郎監杭州軍
 資庫轉運使使攝華亭縣他使者有宿憾因民訟連及
 下獄奪官流永州更赦徙池州杜門隱几為文雄奇峭
 麗與蘇軾曾鞏黃庭堅倡酬以老按舊志云宋史本傳
 無令崑事然宋時凌
 萬頃志已入職官志
 當由宋史未詳耳

崑山縣志 卷二十一
陳郛字彥聖第進士知崑山縣歲饑屬邑希部使者意不敢請蠲郛曰歲歉而賦不蠲民必流轉溝壑請之甚力竟蠲之後爲司農丞未嘗謁政府遷太府丞請外除閩漕以元祐黨坐廢復朝奉大夫卒郛性清鯁歷官五十年如寒士

梁澤民南劍州將樂人政和中爲崑山令有惠政其父伯臣來就養凡所設施得於庭教者爲多

姚舜明字廷輝越州嵊人宣和初知崑山縣至官月餘以母憂去欽宗朝爲御史僞楚之際挺節不汙南渡後仕至戶部侍郎卒贈太師

張漢之父景修兩爲憲漕五領郡符而家極清貧漢之爲崑令政務寬厚緩於催科人謂其家世清貧自來無此故不欲與人索也

程沂字詠之洛人伊川先生頤從孫紹興間知崑山嘗修縣庠張九成爲作記爲政中和有古循吏風

汪大猷字仲嘉慶元府鄞縣人紹興十五年進士知崑山縣丁父憂後歷官至敷文閣學士大猷好周施敘宗族外族爲興仁錄率鄉人爲義莊眾皆欣勸

李結字次山河陽人隆興末知崑山值大水民饑結因之以興水利取供上羨餘及勸分所得爲工直以募役濬浦五日新洋江小瀆茜涇下張顧浦濬塘三日郭澤七鵝至和五旬而工告成救災興利一舉兩得會有僧犯

崑山縣志卷之二十一
法官籍貫田若干結請於郡以貲修縣學以田養諸生
經營堂舍規模具備

葉子強縉雲人學問賅博工詩文淳熙二年知崑山政尙
簡易在任三年百度修舉以邑有潮過唯亭出狀元之
識遂建問潮館於駟馬橋西後潮過唯亭衛涇遂魁天
下又以前令去任無所稽考徧搜史牒取雍熙以後五
十六人刻諸石留意學校增修黌舍養士豐贍士多德
之入官奉常擢朝奉郎權知秀州

周承勳廣德人博學能文舉進士爲新昌尉發奸輯盜民
賴以安知崑山縣政平訟簡民多念之

潘友文字文叔東陽人與朱熹呂祖謙友善開禧初知崑
山寬厚愛人人呼爲潘佛子秩滿爭結綵於路以志去
思友文曾植桃於山題詠甚多

巫似修嘉定辛巳知崑山時學宮卑陋似修始撤而新之
闕麗雄深十倍疇昔他做政俱爲一洗士民懷思建祠
祀之名巫侯祠

潘彙征字泰初建康溧陽人記問該博宗伊雒之學嘉定
中第進士廷對剴切劉宰嘉其志不苟求學行兼備薦
之於朝歷知崑山縣以廉明聞調繁昌卒

徐聞詩字子言嘉興人性穎悟八歲通九經理宗時由童
科擢第淳祐中知崑山興修學宮設六齋日居仁由義
教忠履信成德致道後知惠州

項公澤字德潤永嘉人以童科擢第淳祐間由長洲丞辟宰崑山前此自李栻秩滿後更十三任不以善去公澤爲政廉敏百廢具舉留意學校買田養士以文學飾吏事禮聘凌萬頃邊實修玉峯志去後民立生祠官至中順大夫知安吉州

林桂發咸淳間知崑山政務愛民心存教士增建學宮前令項公澤有生祠在學與巫侯祠相對桂發改築併爲一祠旣去而祠成邑人以郡守黃萬石與桂發並增祀其中稱賢守令祠

元

潘昂霄號蒼崖濟南人至元十九年尹崑山以文學飾吏

事所建立悉中肯綮有古循良風累遷翰林侍讀集賢殿大學士嘗薦崑山人范國雋於朝考校所業中程以山長區用昂霄任侍讀時奉命窮河源從濶濶出得其說撰河源志行世

王安貞字吉卿安陽人由中書僉寫補浙西帥府掾至元二十九年授浙省理問知事大德七年改永嘉縣尹有異政歷遷工部主事宣徽院都事改任崑山知州適州治初遷安貞規畫創建費鉅而民不擾政教懋舉秩滿授饒州路治中後家於崑子孫遂世居焉

八資刺字思齊畏吾氏後至元丙子監崑山州警敏詳審冤獄多平反性尤好士先是有醫術僉人睥睨學廩盡

屏逐諸生立石以滅其跡入資刺至以興復自任選幹
吏王復初典史陳大年重修廟宇建採芹亭復諸生籍
毀黨錮碑廟貌儒風俱煥然一新復建州廨後堂皆不
擾而辦及解組士庶攀留者眾脫鞬截鐙幾不容去
那懷本蒙古瓮吉刺氏泰定初以武德將軍爲崑山州達
魯花赤時州治新遷公廨未建懷募里正興役有方民
皆樂從先是上官蒞州供帳器用悉賃於富室懷以公
罰錢置造百用具備應役者始息肩居官敬儒重老人
皆賢之

字羅帖木爾字存中唐兀氏祖忽刺出銀青榮祿大夫湖
廣省丞相父徹里帖木爾中奉大夫湖廣省參知政事
字羅初授承務郎直省舍人遷奉訓大夫武備寺丞歷
大府監提點至正辛巳冬以奉議大夫來監州事適初
立都水庸田司開濬河渠受委臨督竭思經營兼存撫
卹尤加意學校捐貲造文廟雅樂及鐫行州人楊諲所
著州志暇則延儒生講論義理諄切不倦嘗施粟拯被
火人戶百餘家歲旱齋宿曝烈日中以禱力善愛民士
民皆感悅之

史文彬丹陽人至正九年領崑山州事明年春海寇犯太
倉官軍入海剿捕連數百艘文彬悉出官帑餽餉無擾
於民前此兵出所過剽掠文彬嚴爲禁制有卒稍橫反
接於市鞭之置諸獄眾乃斂戢新孔子廟增學官弟子

員勸督農桑均徭簡訟士民悅服

盧僧孺字希文其先范陽人後徙濮陽僧孺器宇凝重以祖文昭公蔭授承事郎侍儀司通事舍人歷知遼州鳴沙宜興等州至正十八年擢常州總管府同知道阻弗克上太尉府辟為崑山知州為政寬平得體以年老辭位卒葬崑山廣慈尼舍之左

僕侯斯高昌人至正二十三年以治縣第一擢知崑山州事政尚寬平境內忠貞孝義之事多所旌白以州為張昭陸遜故封立廟以祀又葺王葆李衡劉過及朱虎妻茅節婦祠墓置田給贍邑士賦崑山五詠以美之在州二年以最遷知嘉定

費復初字克明壽張人至正間為崑山知州剛直廉明推心待人自延祐元年州治遷太倉至正丙申復移馬鞍山下學宮久廢復初拓舊址為之改築黌宮一新暇則與諸生講說書義扶植綱常柯九思為政績詩以美之明初遷蘇州府同知歷官福建按察司副使歸老於崑卒年九十六

明

芮翀字子翔榜姓魏郟城人洪武二十七年進士初知墊江改金壇三十一年改知崑山首革庫子祗候諸弊時催糧勾軍官校久為民害每以籍官屋為牢取里甲輩禁之淹滯多死者翀悉解遣之復奏劾官旗之娶婦生

子於崑者朝命御史李岳究治械送京師凡二百餘輩
永樂元年坐事發遵化炒鐵耆老王榮等伏闕訟冤詔
馳傳還任復奏免包荒事故田糧十八萬三千有奇尋
以大水奏開吳淞江淤塞二十餘里特命尙書夏原吉
太常少卿袁復臨視之紳陳開新塞舊之策多見採納
五年以母憂去未幾陝西僉事馬祥薦紳才堪理劇吏
部奏崑山固劇邑紳素得民當令再還舊治會勾軍百
戶修隙誣奏逮京訊問事白再馳傳知崑山十三年丁
父艱去紳爲人雅正寬平務持大體畧近名赦小過而
局幹甚精書削糾紛治之綽然前後在崑一十八載精
采彌著去之日民皆流涕後爲廣東道監察御史改知

泰安縣再徙清豐宣德六年卒於官

馬文炯山陰人洪武間以鄉舉除興化教授永樂十五年
由通政司經歷改知崑山剛介有爲政令明肅不爲權
貴少屈奸豪屏跡胥徒畏之如神明未滿考而卒民悲
思之如父母焉

羅永年字延齡宛平人由生員授鴻臚寺序班歷北城兵
馬副指揮正統元年知崑山張弛適宜下民賴之馬鞍
山舊無樹木永年徧植以柏歲久鬱然時人名爲郎官
柏作詩美之尙書胡濙有郎官柏記刻山巔

邵昕字宏啟餘姚人永樂中以薦辟授長洲縣丞長洲賦
重前此官丞者悉坐催科之累或至厲民以求稱職昕

獨以德化召諸大姓開諭利害鞭笞不施而歲額如期
辦集九載秩滿巡撫周忱知府朱勝上章交薦擢知崑
山俄以父喪去逾小祥會崑山逋賦幾盈百萬兩又交
奏起昕乘傳復任歲餘逋賦通完調知贛縣去

鄭達字叔通襄陽人宣德十年以鄉舉入太學授盩厔知
縣復西洛峪水渠農賴以濟景泰五年蘇松大饑巡撫
李敏奏乞選能吏以拯民艱部以達應進六品俸調知
崑山下車見饑民填塞衢路及閩濟農預備二倉皆無
實積乃連日夜走鄉郭就上中戶勸令出粟得穀數千
斛作粥飼飢者日再給已而疫作復延良醫療之每躬
親督視民廬舍毀於水爲市竹木并撤官府敗屋以給

之春則量給穀種全活不可勝數有千戶以捕盜下鄉
攫民財達發其事竟成之達謙恭樂善嘗就鄉紳鄭文
康耆儒龔詡沈魯輩時時咨訪民事教諭陳登有治才
儒士周號有文學咸爲推轂凡孝義貞節之事皆旌白
焉天順二年卒於任文康爲狀其事

唐素字豫叔京山人成化三年以進士來知縣事下車卽
芟奸剔弊人畏其嚴明獄訟頓息三年調長洲六年遷
御史歷官廣西僉事

按成化二年以前進士題名榜並無素名姑依原志俟考

楊謚字文寧儀封人成化己丑進士知崑山明敏有爲廢
墜皆舉利澤在人去猶思之仕至兵部右侍郎

余璣字懋器臨海人少以文學名登成化乙未進士爲崑

山令寬厚簡靜不尙苛察遇事能爲民任咎在崑五年
公罰四十餘條俸嘗不給恆至絕糧久之擢御史去
楊子器號柳塘慈谿人成化丁未進士宏治初來知崑山
下車卽置巨猾數人於法扶善鋤惡風行四境間入民
家察其勤惰而勸懲焉尤加意學校擇士之秀者親加
教督過塾師門或下車取童子課程考校之若子弟然
暇則與邑中耆儒沈魯輩講求時政利弊表章先賢祠
墓撤毀淫祠百區以其材充廟學公署之用禁絕僧道
巫祝游民及山神會邑中尙鬼之俗爲之一變未及三
年以父憂去後復知高平調常熟召爲考功主事累官
河南左布政使卒於位崑民思其德立柳塘祠於馬鞍

山前春秋祀之

吳祺字貴德豐城人嘗爲永平教諭登宏治壬戌進士明
年來知崑山寬厚廉明政務修舉利澤及民延請御史
顧潛修崑山志後擢御史仕至副都御史
方豪字思道開化人正德戊辰進士庚午知崑山縣時吳
中大水城郭外一望巨浸野無炊煙死者相枕藉豪以
民皆逃死不能催徵脫冠服詣郡獄四十三日於獄中
具奏請如漢文減租兼停一切錢糧俟豐年次第帶征
朝廷特從其請蘇松四郡及浙西三郡並免漕糧其疏
稿及上王巡撫書吳中人皆傳誦之明年春霖雨妨稼
會撫臣行縣豪徒步請勘走陷坎窞中民奔救哭聲沸

地撫臣動容爲請於朝又減稅糧之半豪才思敏贍所至皆有題詠無何以艱去厯官福建副使

施德禎字天瑞餘杭人正德辛未進士癸酉知崑山爲政精勤德威並用而不事嚴酷人自畏之尤加惠熒獨縣遭水患減隸從親詣鄉保察被災者蠲其租民沾實惠性剛果令在必行好摧挫權勢以是罹謗忿甚疽發背卒貧不能殮僚屬縉紳爲具喪而歸之道路皆爲於邑尹嗣忠字子貞神策衛籍涿州人御史綸子正德丁丑進士知崑山下車卽置巨惡一二人於獄號令風行四境大治爲人不事表暴民多安之入爲刑部主事厯廣信知府累官兵部侍郎延綏巡撫

馬思誠宜陽人正德末以貢授長洲縣丞嘗攝事崑山性淳謹而繩下嚴時用刑振弊皆心服無後言巡撫李充嗣委以勘災思誠簡覈甚精里胥無敢因緣爲奸旣而奉旨蠲賑民皆德之

宋伊字汝任裕州人嘉靖二十年進士知崑山蒞事明敏催科不擾而取辦恒先他邑性簡靜不苟言笑人不敢干以私歲連祲伊力請上官發粟賑救民賴以生邑多鬮訟初至持牒訴者盈庭期而鮮再期而空矣尋擢戶科給事中

祝乾壽字健卿應城人登嘉靖三十二年進士卽以是年知崑山明年四月倭寇猝至由三江口薄東關乾壽乘

城親當矢石料邑中民分上中下戶守禦丁壯傳陴老弱運瓦石士庶感奮鄉紳王任用朱隆禧舉人歸有光丁允亨秦霑等共畫便宜左右之諸生潘蔚卿晉日亨陳淮等率眾接戰輒有斬獲柴秩柴輔元率族丁三百餘人守東關殲賊尤多又募死士夜往江口燒其船賊遂轉薄西關皆濡絮被裹衷甲負板蔽扞寇蟻附猿臂接乘城上或穴城深入城垂破乾壽慷慨誓眾執金鉦鼓之莫可誰何守陴者皆哭忽一老父進曰但沸桐油雜廁穢從月城隙下之賊可擒也如其言果得渠魁二大王者縛旌竿射殺之賊乃解圍去乾壽循城憇土神卜將軍祠覘其像卽西關老父遂上其事春秋祀之乾

壽尋以艱去後擢御史崑民祀之卜神祠右黃岡樊玉衝題其祠曰勝生爲之記

彭富字仲禮大理衛人嘉靖壬戌進士來知崑山縣時當辛酉大水後民皆流散繼以大疫富撫卹倍至民以少蘇馭胥吏甚嚴稽覈錢穀不少貸閱兩月置積蠹數人於法豪戶蔡江沈詔等七人誘小民產攬歸已戶每領運至京以積逋累人破產富廉得其實悉捕問遣平居有請託者必和顏受之及聽斷一衷之於理後無復有請託者有少年甲科與盜通富持之急其婦翁亦大僚也爲代請至屈膝者再卒窮治其黨而後己擢戶部去仕至四川巡撫

王用章字汝平祥符人嘉靖乙丑以進士知崑山性通敏簿籍過目卽洞然日進父老於庭諮訪利病由是周知民情清政兌定雇役釐弊剔奸纖微必察會撫臣下厝頭糧長之議用章廉知領運者受飛詭害嚴督推收使田歸主戶糧絕寄徵自此按田輸役按區撥運民樂其公巡撫海瑞行部至縣濬吳淞江用章率工徒先竣事民不知役瑞意在遏抑强豪仕宦家重足而立獨崑山以用章故民無告訐及士大夫者聽訟晨至夕鞫後幾至無訟公堂闐然嘗有雁止於庭人爲賦來雁詩以美之己巳庚午縣苦水災力請於撫臣漕米得改折性灑落能多飲而不醉嘗與士大夫從容山水間一以私請

則毅然正色有鄉紳某父子懷嫌宵小構之幾至相夷適其人以園亭落成招飲酒闌用章忽曰今日欲鞠一公事問何事曰卽公父子間事也呼其子出數之開以至情父子感泣誓終身慈孝因復命酒飲極歡顏其堂曰遂初言遂爲父子如初也三年報最民詣闕請留遷常州府同知仍管縣事前後凡七年召入爲主客郎不赴歸而優游林下以上壽終邑人爲建祠於玉柱塔之左後其子曾一至崑山百姓聚觀成市有泣下者劉應龍字在田邵陽人萬曆辛巳以進士知崑山值大水民饑應龍巡行勸視勞來不倦是歲獲有秋民輸租時運弁淆亂斗斛旗軍白晝捽人於市應龍縛旗軍召弁

平量而去御史入弁言劾應龍徧袒賦長廷議直應龍免議時張居正當國清丈田畝應龍白御史崑山自周文襄清丈以來生齒日繁民居稠密勢不可丈田賦又不減於昔時不如勿丈便在任五年召為御史丁亥吳中復大水應龍在北臺疏請甚力詔免崑山秋糧數萬後官終南太常卿

華亭董其昌書遺愛歌石刻今在火神廟壁間

呂兆熊字渭陽直隸柏鄉人萬曆丙戌進士逾年授知崑山縣蒞任後疊遇旱潦兆熊加意撫卹停徵賦平獄訟民困得甦邑馬鞍山舊多柏為故令羅永年所植至是漸戕盡兆熊徧栽以松禁樵采去後民思立生祠於山陽以祀之歷官總督漕運繼兆熊令崑者為陸應川應

川字鍾符豐城人亦丙戌進士去後十餘年士民立去思碑以志弗諼歸子慕稱其為治務安靜不擾民厭繁文苛法以至誠相感吏民愛而習之諸壽賢撰文稱其庠有教俗有勵城有築隍有濬繕戎器備積貯省徭役利無不興弊無不除以忤上官被劾去

聶雲翰字搏羽曲周人萬曆壬辰進士授崑山知縣長身方面狀類神人心計口辯皆軼倫其治以抑豪強祛積蠹為主而才足副之將編賦役以為戶清則田出田出則役均乃總其戶履畝校之剔詭寄覈飛灑造虎頭鼠尾冊自畝零以上至百千萬計列上中下三等定役於是賦役均平無倖脫者故事里甲在鄉為排年在城為

坊長上官經臨供具皆責之坊長煩費至破家雲翰取
庫銀爲供具坊長之困永除繕修城陣所度丈尺及工
費屈指而定人以爲神三年治成以實戶口闢荒蕪清
賦額興禮教備荒歉五事實政上聞校士取才氣新異
者徃徃卽命中在任四年入爲兵部主事調禮部憂歸
卒邑人立碑文筆峯巔建祠薦嚴寺前尸祝之

樊玉衝字元之黃岡人萬曆乙未進士初授商城知縣政
尙清簡邑大治會礦使所至騷騷玉衝偃蹇不肯下直
指憐其才請調崑山人謂崑山邑劇不可以商城之治
治也玉衝曰惟煩也故當臨之以簡凡勸農息訟約供
費絕餉遺一如在商城吏胥爲之束手徃徃謝去方初

至時按前令聶雲翰故牘喜曰吾願爲曹參然每周思
本末而損益之凡前令之釐革未盡者無不求爲盡善
會當編審隱覆萬狀聶雖精敏必居別署鈎校累月乃
竣玉衝獨以三日畢豪髮無爽或問其術曰我何術但
於平居訟牒中默識其飛詭若干某田浮役若干某役
浮田若干十得二三焉證以征逋之籍十得五六焉又
詢之紳士試之老吏十得八九焉人自不可欺耳聽訟
務平其情勝者不矜筭者無怨待士有禮督學設門禁
簿使籍記諸生之好至訟庭者玉衝易其名曰求澹臺
生簿而干謁者知愧庚子冬入覲無一錢通要人吏部
猶以卓異推兵部武選主事而旨不下卽馳歸省旋復

詣縣時臺司責逋賦甚急長吏多奪俸崑山積逋至二十萬玉衝惻然曰此民逋賦時我數齡耳今其人少者壯壯者老者死我何愛我俸而窮此不可究詰之逋哉其姑緩之然民服其恩義樂輸恐後有不給輒計節省銀補解不使民知在崑六年廉介如一日以學宮敝壞出帑羨繕修未竣事聞父煒病即乞歸養上官及士人競留之玉衝竟解印付博士乘夜戒行蕭然同兩奚奴去逾年卒玉衝體素羸自奉至薄自為諸生至縣令服用無兼副有乞者即推與之嘗乘小艇視水災與饑民相對噉菜粥而甘之平居食不過二器乾蔬豆羹外或加二滷卵崑民間其歿如喪考妣建祠馬鞍山巔稱

之曰孝介先生民有疾走禱輒應華亭董其昌督學楚中為立祠於鄉邑人李可汧為楚學使復葺而新之

王時熙字緝甫南昌人萬曆辛丑進士初知河南靈寶縣甲辰調知崑山承聶雲翰樊玉衝兩廉吏後時熙守其條約以古教化為治尤喜表章節孝御史楊廷筠以私憾欲傾時熙已而詞得治行轉劾薦之擢山西道御史終太僕少卿

陳祖苞字令威海寧人萬曆癸丑進士明年來知崑山才性開敏剖決如神力清賦役蠹弊時邑中大戶以解糧為累按田差次甲乙令民每畝納銀六釐使之津貼細戶以銀差為苦定為五年一役兼佐以津貼兌軍向魚

肉賦長索耗無已祖苞會諸兌者理論而氣挫之立減
耗米萬石有奇官戶素多冒濫執會典裁汰之又以民
多積欠由荒熟不同乃定旱區十三水區十七熟區四
十有二以爲徵糧緩急田之隱占者嚴行文量之法挨
號編冊名曰魚鱗使奸民無所規避邑東南由青浦出
黃浦滙於海沮洳爲患奸匪又出沒其間祖苞設法籌
費計里築石梁自是無病涉者精於校士經賞識而得
雋者幾二十人嘗一攝太倉再攝常熟兩邑之民交頌
陞兵部主事歷副都御史順天巡撫子之遴 國朝順
治中官少保大學士孫鼓永官吏部左侍郎

錢肅樂字希聲鄞縣人崇禎十年進士知太倉州嘗攝崑

山縣事時綱紀凌夷豪奴動與黠吏魚肉平民兇徒結
黨至有殺人焚其屍者肅樂悉痛懲之始斂迹又以朱
白榜列善惡人名械白榜者階下子大杖久之杖者日
少又練集鄉勇數百人以爲防禦歲大旱奉檄濬開塘
浦肅樂獨肩其任轉輸平糶貧民得沾實惠遷刑部員
外去魯王時以大學士殉難 國朝乾隆中追諡忠節
萬曰吉字允康黃岡人崇禎庚辰進士辛未來知縣事歲
大旱民飢曰吉率里老勸富室平糶施粥至團糠粃以
活餓者明年春政府周延儒姻黨毛士龍爲七省漕儲
道知曰吉強項身臨督漕且示久留意曰吉囚服哭行
署外民千餘人跪曰吉後亦哭士龍令家丁持白梃出

叱曰鼠輩擁縣官反耶且奏請斫汝民憤激奪其梃擊之家丁四走士龍踰垣得免愬之臺司臺司知曰吉無罪劾免士龍而曰吉終漕務如故未幾按吳者亦延儒黨以疑似事誣曰吉久乃得白尋調任去乙酉與山東巡撫邱祖德起義於寧國兵敗被執至江寧死之妻陳來也死尼菴門生盛符升斂錢葬之北郊未幾其僕面曰吉之骨至因合葬焉曰吉蒞崑時豪右奸胥痛懲不少貨表章先賢樂聞人善時人爲之語曰萬公有二反見上官則骨傲見窮儒則色溫對貴紳則言峻對小民則氣平蓋實錄也

四朝存仁錄云邑舊有同善會曰吉延顧天敘主講敷陳六義民俗一變

國朝

○胡之佑字申如浙江山陰人順治五年任崑山縣時兵燹後戶口凋殘加以前令王鑑多苛政之佑至一意撫綏上官過索供張滿伏謝無有上官亦無奈嘗曰我不以民命易一官及去民甚德之

○郭文雄字鳴上文水人父懷慶丞安之徙家陽曲諸兄皆爲藩臬幕文雄獨習儒工文章順治十五年以拔貢授崑山知縣事皆親決不假手胥吏催科不遣一役摘欠之尤者揭之縣門而輸者恐後收銀盡革火耗錢糧解放例有扣除鹽引開稱例有公稅文雄概謝卻之崑俗囂訟多借假命整人文雄著令殺人者必鄰里公舉得實始坐毋許一人首告漕卒肆橫力行官兌之令橫

加詬詈不爲動以勞致疾民爲設醮祈禳者數處禁屠十日有願以身代者竟以十六年三月卒年四十一卒之日藉草而臥布衾苦禱皆來時故物見者無不流涕士民醵金葬於馬鞍山之陽執紼者數千人立祠墓前私諡曰貞惠先生已而官帑缺額二千冊散無考士民請於兩臺願代輸疏聞報可令下三日而輸畢

○董正位號黃洲開平衛人康熙九年由選貢任崑山知縣時水旱洊臻飢民載道正位殫心撫卹又申請豁荒蠲逋畧云崑邑田地七十二區內有水區旱區版荒區皆田浮於佃糧浮於租無可償而逃者斃者不知凡幾所遺將逃未逃將斃未斃之命皆前任敲扑餘生又值

奇荒嗷嗷垂斃難以錢糧驅迫使之速斃速逃則願以一官任咎也是歲得攤徵舊欠且緩漕米六萬餘石又力整漕規行五米十銀法并請糴和搭兌皆獲施行抵任後注銷訟牘與民更始延紳士盛符升等修葺邑志垂成以積逋免官去

○曾榮科字文開廣東興甯人康熙六年丁未進士十四年來爲崑山令慈和廉謹百姓愛之十六年邑遇水災榮科恤民緩催科與嘉定令平湖陸清獻公同爲巡撫慕天顏疏劾降調去任邑民爭輸糧稅爲之罷市父老詣郡請留莫及也及行邑人葉奕苞贈以詩有百年前後追樊令掬水焚香祀馬鞍之句論者謂其無愧斯言

仇士俊保定府左衛歲貢生康熙三十年知崑山縣臨事精明徵糧嚴而有法時所在苦漕卒橫索士俊定每石加水腳錢十三文此外無所予遇強悍者率民捽擊之害遂息邑人浦裕鉉家人徐閏與張四相毆張久患瘵一夕死奸胥喬莘冒張爲子誣浦主使獄具士俊至廉得其實罪徐閏而釋浦知府盧騰龍囑其仍坐浦士俊不從曰殺人媚人吾不爲也遂以失出被劾免官

○章會印字宸書浙江會稽人貢生康熙辛卯四月以蘇州府同知管常熟知縣來攝邑篆多惠政未久卽去民懷其德立民之父母坊於朝陽門外

○高鈐字重南鑲黃旗人蘇州府同知康熙癸巳署崑山

縣事勵精振刷禁游惰除兇暴殲豪強疏冤滯未期月

百度具舉民俗一變

○李世德字配京鐵嶺人康熙五十三年知崑山縣爲政平恕披覽訟牒洞見原委在任凡三年案無留牘及遷任民建蒲鞭亭以志去思後歷雲南糧道

○王湖維字林熾嵩縣人康熙庚辰進士初授潞城令調青浦秩滿遷主事雍正元年改知崑山時徵收弊孔百出吏緣爲奸逋欠盈積湖維查花詭絕包攬特行滾單銷摘由內發收兌漕糧時胥吏旗丁輒橫取橫索湖維乃議每石納耗羨米六升錢二十三文爲公費違者懲之由是十省八九湖維政尙嚴覈時稱王老虎在任四

年案無留牘筦內肅然擢知太倉州終寧紹台道

○王士任字莘野登州威海衛人雍正癸卯進士三年秋授新陽知縣時縣初析公廨未建章程未定士任與崑令王溯維悉心商榷以次經理以四年三月履任丰裁嚴毅政清刑簡吏民咸畏服官終福建巡撫

○趙瑄字玉章華陽人康熙壬午舉人歷知武陵城父二縣雍正十年補新陽能以片言折獄遇盤錯輒迎刃解與紳士修文廟建義塾嚴鄉約設藥局飢者施以粥死者給以棺十三年冬卒於官士民送者絡繹於道

○許松佶字青巖閩縣人少習吏事爲憲司所知以吏員筮仕乾隆五年秋攝令崑山未三月循聲卓著嘗題署門曰官以不貪爲寶民以無事爲福調知常熟遷知高郵州累官至布政司

○蔣迪號臺江候官人康熙丁酉舉人歷知博羅永安南海三縣皆有治聲以足疾告歸起補天長乾隆五年冬調任崑山明於聽斷不事苛細半載中濬湮河禁戕山掩骼埋胔及義學義倉橋梁道路莫不次第修舉居恒薄於自奉嘗曰留得一分清俸爲民間作一分好事分校入閩以積勞卒年五十五

○張子介號石屏平原人乾隆九年以進士知新陽縣居官不爲赫赫名有訟者輒和顏調解臺檄追徵元二年低瘠田糧子介繪圖請命申覆再四遂邀特免卒以舊

通免官卒於郡邸

○孫耀德舉人乾隆十四年攝篆崑山時有盜與一平民有隙約羣盜擠陷之前令刑求誣服其弟兄赴上官鳴冤以獄詞已具牒十一上終實不理姑以所上詞密授耀德耀德設酒縱羣盜飲乘其醉探之語稍洩窮治得白耀德以原問官自行訊明報竟不自居其能

○康基田字仲耕山西興縣人乾隆丁丑進士二十二年授新陽知縣性英敏勤於政務尤加意士習創建玉山書院選山長定章程課日與諸生往復講論如弟子然嘗表明太僕丞歸有光墓碣在任二年興利除害稱循良第一調任昭文士民遮道攀轅者甚眾後四十年以

河道總督左遷太倉知州因公至邑召故吏老民娓娓談往事至邑廟繭園吟眺流連留題而去一時士民擁觀咸歎爲數百年來僅事云

○郝璦字瑞臣山西孟縣人乾隆庚辰進士越八年選授崑山知縣潔己愛民每聽斷恣民環聽判訖輒左右顧曰爾輩以爲否余不吝改過也催科不事敲扑民感其德輸將恐後己丑大水璦徧勘災區至跣足從田夫走泥淖中南鄉江濱多荒地璦勸令開墾於低瘠者繪圖申憲永免升科勒碑著爲令在任三年修學宮課士子勸農桑嚴保甲善政畢舉以疾致仕僦居委巷一富民嘗賴保全者知其貧擔錢米造門璦曰前判事者令今

罷官者吾也感在令於吾無與亟去毋相溷其人慙而退瓊歸時士庶爲繪攀轅圖歌詠慈惠刊本以傳嘉慶庚辰秋邑人顓憲建祠與新陽令李鴻瑞合祀焉

○王應奎字春溪山東新城人乾隆丁未進士選知如皋縣外艱服闋補新陽性慈厚折獄不輕用刑輒能洞燭情僞廉謹自持服御如寒素嘗捐俸葺明先賢歸有光墓清其界址以居民侵占租息供歲祀勸諸生諄諄以立品爲務諸生多有聞而感化者在任二年移疾歸後歷官禮部主事

○朱樹基字南臺安徽來安人乾隆壬子舉人大挑掣發江蘇攝知崑山縣政尚寬平讞獄尤詳慎邑南鄉有磨腐傭嗜賭偶往西鄉縱博被毆歸溺水觸石破顙死傍岸爲縫工家及檢視詢縫工惶遽不能辨遂誣伏樹基疑而密訪得實破械出之又有因完廩墮而死者或誘其戚屬以死非由墮與主家爭辨樹基勘訊廉其狀立命殮埋結案無株累者調知昭文吳縣所至多惠政遷督糧同知甫任以勞卒於官

○李鴻瑞字道昇福建候官人嘉慶戊午舉人大挑試授江蘇知縣權知高淳丙子秋檄攝新陽篆性廉而慈勤聽斷邑多滯獄鴻瑞一一榜門外以鄉之遠近爲限月餘而積案一空民婦莫氏誣其弟莫寶持刀謀害下獄鴻瑞閱囚疑而鞫之得釋有叔控其姪者訴辯不已鴻

瑞片言折之動以一本至情令各輸誠釋憾俱搏額感泣崑邑民有求判者以越境辭民曰固知越境但非公莫與理者乃判而直之夙工詞翰嘗製諭民詩三十章手書條約千言讀者咸感悚尋攝松江川沙同知未幾卒士民思之與故崑山令郝璣並祀於祝公祠之左

○賀崇禧字吉人山東歷城縣人嘉慶辛未進士以卽用知縣分發江蘇道光十三年授崑山縣知縣時漕務積弊通賦纍纍崑邑尤甚前令因勒折幾成大獄崇禧至集紳衿告以漕政係通省大局非一人所能清釐惟不搶倉中一粒米乃統籌全數均平之民爭輸恐後終任賦無絀性和易折獄不事呵叱卽甚怒僅呼可惡而已

與新陽令沈炳垣遞日課諸生親甲乙其文召與講貫李少司寇清鳳未第時貧不能與計借出廉俸二百金以贈及去邑人立長生位祀之

○沈炳垣字曉滄浙江桐鄉縣人辛巳舉人大挑一等分發江蘇十四年爲新陽縣令每訊事溫言霽色兩造或相爭默坐聽其辭畢徐出一言折之人皆服卽爲所罪者亦以爲沈公愛我也暇輒召諸生論文優者資以膏火手自平銀固封而加圖記馬慮有虧蝕也邑人士與賀公崇禧同生祀焉

○程恩溥字伊齋浙江平湖人道光辛巳科舉人十九年攝新陽令故事催科皆課役遞成數行笞多者至數百

恩溥心不善也答至百輒止輸賦者益不前及去任幾不能成行越歲復攝篆循前政不易也親友勸之則曰吾數十年老蒙師歸仍故業耳何忍以造孽錢博下半生受用哉其謝事盡然通籍而去民甚德之

○蔡世佑字吉堂四川酉陽州人道光乙巳進士二十七年來攝新陽縣事整釐漕弊不事敲扑而民樂輸邑人以廉明公恕頌之世佑為詩四章和者成帙刻為南武興歌集

○楚玉麟字萊泉湖南湘潭人道光乙未舉人咸豐七年來攝崑山縣事莅任延不催徵借資墊解大吏迂之玉麟曰崑山縣橫徵久矣少寬假之以紓民力某不忍踵

酷吏所為也及冬百姓踴躍輸將崑山漕為蘇松各縣最大吏勞之曰今而知君之不迂也遷太倉州同知未行蘇州陷外之玉麟事親孝父卒廬墓三年生平博覽羣書尤深於易著有易義辨止

唐以下佐貳

孟庭玠武康人郊之父能詩為崑山尉生郊於此

王嵩幽州人大理評事適之父元和中為崑山丞昌黎韓愈為撰墓志

權立文公德輿從兄敏於學行薄於宦情為崑山主簿德輿作序送之

劉綺莊毘陵人為崑山尉研窮古今纂稽浩博嘗採摭事

類如六帖狀分二十餘門作類書八卷號崑山編上之於朝

宋

邱與權建州人至和二年爲崑山主簿時議修崑山塘與權厯陳五利一便舟楫二闢田野三復租賦四止盜賊五禁奸商且言事不成請以身塞責知縣錢公紀郡守呂居簡列其議以聞十月治役旬有九日而成名其塘曰至和塘成至今爲利後趙抃王珪並薦堪充國子監直講抃狀曰與權嘗爲江寧蘇州教授學者如歸固窮守道未始隕稜珪亦薦之曰與權困於州縣二十年然文藝優贍議論純正遭時右文宜見收采其推重如此

王綸字德言建康人十歲能屬文登紹興五年進士授崑山主簿二十四年以中丞魏師遜薦爲御史論事忤秦檜罷去檜死召爲起居舍人厯工部侍郎同知樞密院事卒贈左光祿大夫諡章敏

葛洪字容甫東陽人從呂祖謙學登淳熙進士第爲崑山尉理宗朝拜參知政事卒諡端獻杜範稱其侃侃守正有大臣風

謝深甫字子肅臨海人乾道二年進士由嵯縣尉調崑山丞爲浙漕考官一時士望皆在選中司業鄭伯熊曰文士世不乏求巨眼如深甫者實鮮厯知青田縣遷大理丞侍御葛泌等交薦孝宗召見擢提舉常平會江東大

早講行救荒條目全活一百六十餘萬人累拜右丞相
封魯國公諡惠正

王萬樞字贊元金壇人爲崑山尉得海盜盜格吏請出郊
以示親獲萬樞卻之據實以聞終奉直大夫知吉州

凌志云萬樞爲詔之
曾孫遂之父

陳璧字君玉爲崑山主簿留意作養與士子講論勸勉不
少倦造請者無虛日所成就極多

趙彥櫛字文長秦悼王七世孫父訓之以死事贈直秘閣
彥櫛舉進士爲崑山主簿嘉定十年以集英殿修撰知
平江郡時海盜出沒爲患彥櫛奏分崑山之半置嘉定
縣屯兵守禦海盜官至寶謨閣待制

吳堅字彥愷天台人淳祐中爲崑山主簿留意學校講肄
無虛日遵朱子簿同安之法以厚風俗正人倫明義利
闢奸邪爲先務在任多所增創德祐末拜左丞相

元

姜復昌號漁所本籍濠州宋忠臣淮東都統才之孫也父
文龍入元官嘉興遂爲嘉興人泰定初復昌以敦武校
尉任崑山州判官先是知州錢野仙伯泛差協濟戶不
預定姓名隨所逮得方填文引民不敢出市所在抗拒
復昌至適行津助法與省官覈產程役審諦平允寬免
單窶小戶里正百十三名民大感頌復昌廉而有才容
氣溫舒而遇事執直雖悍戾長官辭色爲屈差覈湖州

僧田助役回屆秩滿祖帳已倍常皆約以遠日抵夜潛移舟去民追餞不及咸嗟悵而返

郜肅字彥清山東人才器宏博至正間任崑山州判專職農事崑田多窪下肅究心隄防衝冒風雨與民同勞苦勸勉程督增墾荒田若干隄旣成潦不爲災人咸德之徐石麟字仁孚蘭溪人至正間任崑山州判官斷疑獄興水利征科有法事集而民不擾及退休遂家崑山貧不自給不肯屈節於人卒葬城南盧熊志其墓石麟貌秀偉性明遠出處議論澹然有古君子風

明

韶護岐山人洪武二十九年以戶部主事謫崑山典史公

勤明敏事無疑壅後陞仁和知縣

金華蕭山人正統初爲崑山丞承委勘水災見民舍飄搖以麥查雜靡蕪食之華流涕不食曰田禾雖間有可望纔十之一二若作全熟秋徵何辦乎同僚或爲之慮曰脫有罪華自任之竟以荒白是歲得准災民不告飢鄉無盜賊華之力也及卒民悲思之

黃員通字仕達南海人景泰間爲崑山主簿能識政體司徵稅公而有法邑人稱之

紀智成化中由吏員爲崑山主簿質實有守官舍寂然如僧寮舉家食粥時或不繼不少變也每出人咸呼爲紀青天在官五年致仕

揭夔南豐人嘉靖中任崑山主簿奉委稽覈賦額均餘糧
於吳江等三縣民咸賴之陞潮陽縣丞
石肯構南樂人嘉靖中任崑山勸農丞居數月廉得蠹猾
五六輩撲殺之胥吏震懼性不飲酒一青布袍五年不
易嘗讀邑乘宋邱與權簿縣時興修水利狀則訝然曰
吾北人不知其利若是乃行縣相視督民興修時野航
掀舞港瀆間所供惟杞韭水薤風雨瀟瀟欣然自得爲
人操守剛介遇事能斷纖芥不受人餽在任二年卒檢
其橐不滿十金還櫬時送者數千人

李三省字思曾鄖陽人萬曆九年以貢爲吳江主簿陞崑
山丞承職水利邑頻年苦潦三省乘小艇循行阡陌間
便宜修救未嘗受民一鮓一菜也有范某者煽惑人爲
佛會號佛頭誘淫少婦三省廉得其實杖殺之妖風頓
息初在吳江置一竹兜出入舁之及在崑未嘗改易視
章革帶常質子錢家尙書嚴清稱之曰居官如李丞天
下豈復有墨吏哉已而病卒邑令劉應龍視其含殮見
牀第無幃爲之流涕民思其德祀柳塘祠

國朝

○唐瀛字士林杭州人由拔貢爲崑山縣丞有志操裕經
世才農隙時築圩岸以免水患民甚賴之邑中玉帶河
淤塞三百餘年夷爲平陸乾隆癸亥春邑紳呈請開濬
瀛奉委監督跨占者十餘家議給官價拆毀明年四月

工竣瀛任事必參酌情理故事集而民不擾

○廖光謨字化南貴州貴定人乾隆壬申舉人大挑試授知縣借補新陽縣丞居官廉明仁愛禁私籬建橋梁濬開東市河在任十二年一無苟取內遷通政司知事未赴卒貧無以殮士民賻金助之喪得歸

隋以下教職

朱燮吳縣人大業九年為崑山博士身長七尺涉獵經史頗知兵畧楊元感舉兵劉元進應之將渡江元感敗燮知天下將亂謀於學而起兵民苦役者赴之如歸自東陽至京口千餘里並受節制

元

王夢聲字應甫嚴州分水人宋司諫縉之後登咸淳進士授迪功郎秘書省檢閱致仕至元十三年置蒙古字學行省辟夢聲為崑山州學正因家湖川塘時兵燹之後學宮傾圮夢聲極力修葺二十四年大水學田所入不足供用以已資佐之不復取償學廩在任入載學宮一新今櫺星門內明倫堂前銀杏樹皆夢聲所植也

孔淵字世陞宣聖五十三代孫六世祖端越為宋顯武大夫隨高宗南渡居越至淵父之敬為通州監稅淵由通之崇明徙家崑山延祐元年州治遷太倉新作學宮淵多所經畫遂攝學事學行修治為士林所宗號莘野先生子克讓孫世學皆有文行克世其家

崑山縣志卷二十一
湯彌昌字師言瀏陽人宋大理少卿璫四世孫龍虎榜進士暉老之子爲崑山儒學教諭至瑞安州判致仕生平篤志義理之學有周禮解義碧山類稿湘江權歌等著趙璧其先睢陽虞城人宋觀文殿學士謚康靖槩之十世孫以經明行修爲崑山州學正遂家焉璧四世孫浩家藏趙氏世系圖并康靖告身及張方平蘇軾所撰神道碑文邑人葉盛題其後

明

張守中字大本邑人少從楊維禎學明春秋中元至正十三年鄉試洪武初訓導崑學復訓郡庠弟子不遠千里負笈以從稱名師

陳潛夫字振祖一名潛字潛夫錢塘人徙居崑山性端方善訓迪洪武六年爲縣學訓導後陞國子學正上獎直臣簡師儒勵廉恥審用人四事上嘉納之

林鐘字仲鏞其先以魯人附籍杭州父仲山遷華亭鐘學問該博和易近人洪武二十年任崑山訓導接引後進惟恐弗及諸生一語之工必揭講堂以示人故一時翕然宗之鐘亦樂崑風土卜居鬻宮之左自號松谷道人會帝臨軒策士鐘和得賢才詩稱旨擢湖廣慈利知縣茅岡峒蠻爲患鐘單騎往諭相率從化永樂初陞吏部考功郎中拜山東參政修治孔廟擇孔氏子姓授以經史後以失察女妖唐賽兒事就逮以死

季篪字仲怡常熟人永樂末以經明行修薦授崑山訓導
篪有文學精於纂述著有友梅集崑山常熟崇明三志
遷巢縣教諭

朱冕字士章嘉興人宣德間爲崑山教諭性剛毅方正立
條約示諸生朝夕升堂衣冠步趨必飭夜向闌學舍中
明晤聲猶相屬冕時秉燭叩門與語以德業優劣爲待
士之次識拔諸生張穆沈訥鄭文康夏遂葉盛陳翊瞿
泰安郭瑛八人相繼掄魁皆冕之教也巡撫周忱行部
至崑舟次撻人冕進曰公息怒可至行署治之忱從之
召問故冕曰下車之始觀瞻所繫恐因怒傷人累盛德
耳忱謝焉已而設太倉鎮洋衛學薦爲教授謂兩衛官

曰吾爲爾子弟得一良師宜隆重之學者稱鹵菴先生
久之致仕卒葉盛爲之表其墓

張倬字士昭山陰人正統間以鄉舉分校崑山時年尚少
師範甚嚴凡有禪風化之事毅然力行擢知閩縣卒倬
少穎悟篤學文法秦漢詩備諸家體裁以文雅稱
張汝才字孟德化州人嘉靖甲寅爲崑山訓導甫至值倭
警與縣令祝乾壽晝夜巡守旣籍守陴者爲什伍汝才
屬諸生爲之檢稽賊矢貫耳拔之不爲動獲間諜以徇
督守益堅寇退歲不登汝才周卹諸生備至擇尤貧者
棲之廡下日飲食之擢興安教諭

沈應奎字伯和武進人萬曆辛丑以鄉舉任崑山教諭崑

士故聞應奎宿學至則翕然宗之其教不立成法而以
身爲的課諸生以制義曰士人先資之信在是也有歸
氏家人子恃青衿侮其主御史欲庇之應奎爭之力至
欲解官去不得已寘之法凡諸生生無養死無葬及節
烈之不能表於世者多方周濟表揚之邑令王時熙雅
重應奎相與修葺文廟增置祭器餘如敬一射圃名宦
諸亭祠蕪廢一新又表章先哲墳墓及其後人遷南京
國子助教去之日撫堂前元雲石歎曰相友五年今且
別去爲賦奇石歌以自况歷刑部郎裕州牧汀州守多
惠政忤權要罷歸起尙寶丞逆奄時又削籍應奎少有
絕力重然諾好急難萬厯庚戌神宗不豫時福藩猶在

邸中外兇懼閣臣葉向高與應奎密計綏定之

蔣之芳字士榮華亭人萬厯壬子以歲貢授崑山訓導少
以篤行高文爲尙書陸樹聲推重至崑規條甚具課諸
生必以第一流相勗凡遇片長稱之如不及而廉潔自
好修脯一無所受兼能書工草隸後擢九溪令

堵應畿字肇域宜興人萬厯末分訓崑庠潔清自砥教士
有法嘗曰師儒之與弟子必恂恂循循鼓焉而風潤焉
而雨所培其元氣而挽其頹習者在行所無事而已一
時士習蔚然嘗考定從祀先賢先儒位次自唐以來名
宦鄉賢缺者補訛者正輯祀考五卷以垂後邑人爲立
堵公祠以祀之

皇朝詞林卷二十一
洪應紹字念卿歙縣人天啓乙丑以舉人授崑山學教諭廉
靜端厚有古人風諸生有過引入私署正言責令改悔
終不暴其惡遇有爭執善爲停平間以金謝者受而散
之貧生蔬水自奉泊如也有顯者斂怨積年及敗邑人
羣起爲難岸有兩生爲之倡顯者思甘心焉所以逼脅
應紹者百端卒不爲動無何歿於任

國朝

○方式玉字玉如歙縣人善書工詩順治壬辰以歲貢授
崑山訓導課藝考行單寒多所造就時春秋丁祭樂舞
闕如式玉搜藏中得舊器乃謀補缺壞仿闕里志圖督
樂舞生肄業樂廢百年一朝而復又力請從祀太僕歸

有光中丞蔡懋德於鄉賢祠甲午秋闈報罷卒

○梁子淇字儀武南陵人康熙中由舉人任崑山教諭性
端方嚴重課士靡間寒暑士咸踴躍思奮所陶成甚多
興修學校募修啓聖祠濬泮池徒步暑日中無倦色司
教幾二十年陞貴縣知縣去

○王世樞字斗初寶山人雍正乙卯以選貢舉京兆旋由
明通榜授崑山教諭博通淹貫詩古文信筆立就精鑿
別文藝一經點竄斐然改觀尤加意訓植單寒懇懇如
親子弟秉鐸五載卒於官

○程瑤字連城宿州人乾隆乙丑以歲貢任新陽訓導秉
性剛直不與時俯仰馭書役尤嚴愛育人材不啻口出

集諸生課文藝諄復不倦間周其貧乏傾囊無吝蒞任四年卒於官

○吳靈英字季發全椒人歲貢生乾隆十五年爲新陽訓導日進諸生與之講論選刻與成堂會業專以理法主持風會新生執贄多寡有無悉聽之在任十餘年比歸資斧幾不給

○王廷琬字玉茗金壇人雍正壬子舉京兆乾隆庚辰授崑山教諭清介有守於書無所不窺在任十載修學宮考祀典課諸生士習文風爲之一變以老乞歸

○陳如岡字學山穎上人饒經濟具吏才乾隆戊子由歲貢授新陽訓導以振興學校扶植士氣爲事越四年終

養歸又三年服闋再任嘗散步郊外與農夫課晴雨話桑麻於邑中善舉尤獎勸備至其終養後代任者爲皖城李璋璋字質堂以舉人選授諸生來問業者霽容愉色與之講論治苜蓿盤歛留之盡酉始散逾年卒官

○臧兆岐號芭亭宿遷人嘉慶丙寅以歲貢授新陽訓導性醇厚與諸生接和氣藹然新生具贄往時輒較量厚薄兆岐獨一切聽之學宮歲久就圯方謀以次振興未半載病卒時家人俱未至邑紳李以健偕諸生經紀歸其喪繼之者爲張興載字悔堂華亭人以廩貢試職權新陽訓導博雅工詩嘗作新洋江棹歌三十首紀邑中名蹟會以健重修學宮告竣謀修葺久遠計乃做淮陽

阮學浩灑埽成規斟酌行之其論實創自輿載云

○何錫九號訪亭安徽定遠人道光辛巳舉人選授崑山教諭會邑中修文廟錫九捐俸倡助之精風鑑舊魁星閣在麗澤門左城上南向謂不宜與大成殿背改北向濬泮宮龍鬚河以利文運甲辰科南北闈及右榜獲雋者五人丙午復兩孝廉兩明經錫九平居黎明起督子弟課甚勤接諸生藹然可親呈文輒點竄邑人士翕然歸之上官薦卓異謁臺司中暑卒於任邑人請祀入名宦

崑新兩縣續修合志卷二十一終

崑新兩縣續修合志卷二十一

人物

志乘之詳人物尚矣邑雖偏隅之地而自唐迄今名世英賢醕儒碩彥與夫忠臣孝子風義文章其繼軌而競響者並足為山川生色前志分類以傳綜其目凡十有三曰列傳倣史書之例以名德相副者載入其史有專傳則悉載全傳而以世系軼事附後曰政績治行可傳不論秩之崇卑所以著實用也曰儒林經學理學體用兼備讀其書可想見其人者崇實學也曰卓行特立獨行風節嶄然迥非尋常所可及敦實行也曰忠節前明鼎革時邑人士旅拒王師殉

國難者甚衆迨 國朝乾隆四十一年 賜諡 賜
祠 欽定殉節諸臣錄中 褒卹有加悉蒐羅之
至咸豐同治際邑遭粵匪蹂躪歷四年之久士民抗
節殉難尤甚於前爰據昭忠錄及采未邀 旌卹者
並編入焉曰孝友家庭庸行倫紀之所重也曰文苑
文以載道非特詞章之工已也曰隱逸所以勵志操
也曰耆碩耆年晦迹種德一生足爲後進儀型也曰
好義慷慨任事以其有裨桑梓也曰藝術工書畫則
理含風雅精軒岐則力起呻吟曰游寓或德業可師
或風流足慕曰釋道邑故多精藍古院四方開士羽
流卓錫挂瓢於茲精修其業亦自有不容沒者於分

類中仍各次以時代庶覽者有所考鏡云

列傳一

唐

張後胤字嗣宗蘇州崑山人祖僧紹梁零陵太守父冲陳
國子博士入隋爲漢王諒并州博士後胤甫冠以學行
禪其家高祖鎮太原引爲客以經授秦王義寧初爲齊
王文學封新野縣公武德中擢員外散騎侍郎賜宅一
區太宗卽位進燕王諮議從王入朝召見初帝在太原
嘗問隋運將終得天下者誰姓答曰公家德業天下繫
心若順天而動自河以北指撝可定然後長驅關右帝
業可成至是自陳所言帝曰是事未始忘之乃賜燕月

池帝從容曰今日弟子何如後胤曰昔孔子門人三千
達者無子男之位臣翼贊一人乃王天下計臣之功過
於先聖帝爲之笑令羣臣以春秋酬難帝曰昔朕受大
義於君今尙記之後胤頓首謝曰陛下乃生知臣叨天
功爲己力罪也帝大悅遷燕王府司馬出爲睦州刺史
乞骸骨帝見其彊力問欲何官因陳謝不敢帝曰朕從
卿受經卿從朕求官何所疑後胤頓首願得國子祭酒
授之遷散騎常侍永徽中致仕加金紫光祿大夫朝朔
望祿賜防閣如舊卒年八十有三贈禮部尙書諡曰康
陪葬昭陵孫齊邱歷監察御史朔方節度使終東都留
守諡曰貞獻子鎰別有傳

唐書○按合志本傳後有張承休傳據吳郡志云承休後

胤孫張說謨其墓志云後胤之子小師小師生承休希言篤行去華崇實非法不由非禮不動精於理物敏於從政歷朝議大夫上柱國恒州刺史云云生平事實未詳故附見於此

張鎰字季權一字公度國子祭酒後胤五世孫也父齊邱
朔方節度使東都留守鎰以蔭授左衛兵曹參軍郭子
儀表爲元帥府判官累遷殿中侍御史乾元初華原令
盧樅以公事譙責邑人齊令詵令詵宦人也銜之構樅
罪鎰按驗當免官有司承風以死論鎰不直之乃白其
母曰今理樅樅免死而鎰坐貶默則負官貶則爲太夫
人憂敢問所安母曰兒無累於道吾所安也遂執正其
罪樅得流鎰貶撫州司戶參軍徙晉陵令江西觀察使
張鎬表爲判官遷屯田右司二員外郎居母憂以孝聞

不妄交游特與楊綰崔祐甫善大厯初出爲濠州刺史
政條清簡延經術士講教生徒比去州升明經者四十
人李靈耀反於汴鎰圍閭鄉兵嚴守禦有詔褒美擢侍
御史兼緣淮鎮守使以最遷壽州刺史厯江西河中觀
察使不闕旬改汴滑節度使以病固辭詔留私第建中
二年拜中書侍郎同中書門下平章事明年以兩河用
兵詔省薄御膳及皇太子食物鎰因奏減堂殮錢及百
官稟奉三分一以助用度時黜陟使裴伯言薦潞州處
士田佐時詔除右拾遺集賢院直學士鎰以爲禮輕恐
士不勸復詔州縣吏以絹百匹粟百石卽家致聘佐時
卒不至郭子儀壻太僕卿趙縱爲奴告下御史劾治而

奴留內侍省鎰奏言貞觀時有奴告其主謀反者太宗
曰謀反理不獨成尙當有他人論之豈藉奴告耶乃著
令奴告主者斬由是賤不得干貴下不得凌上教本旣
修悖亂不萌頃者長安令李濟以奴得罪萬年令霍晏
因婢坐遣輿臺下類主反畏之悖慢成風漸不可長建
中元年五月辛卯詔書奴婢告主非謀反者同自首法
並準律論由是獄訴衰息今縱事非叛逆而奴留禁中
獨下縱獄情所不厭且將帥功孰大於子儀冢土僅乾
兩壻前已得罪縱復繼之不數月斥其三壻假令縱實
犯法事不緣奴尙宜錄勲念亡以從蕩宥况爲奴所愬
耶陛下方責武臣以討賊彼雖見寵一時不能忘懷於

異日也帝納之貶縱循州司馬杖奴死鎰召子儀家僮數百暴示奴尸盧杞忌鎰剛直欲去之時朱泚以盧龍卒戍鳳翔帝擇人以代杞卽謬曰鳳翔將校班秩素高非宰相信臣不可鎮撫臣宜行帝不許杞復曰陛下必以臣容貌寢陋不爲三軍所信恐後生變臣不敢自謀惟陛下擇之帝乃顧鎰曰文武兼資內外望重無易卿者其爲朕撫盧龍士乃以中書侍郎爲鳳翔隴右節度使鎰知爲杞陰中然辭窮因再拜受詔頃之與吐蕃相尙結贊盟清水約牛馬爲牲鎰恥與盟將未殺其禮乃給語吐蕃以羊豕犬代之帝幸奉天鎰罄家貲將自獻行在而營將李楚琳者嘗事朱泚得其心軍司馬齊映

等謀曰楚琳必爲亂乃遣屯隴州楚琳知之稽故未行鎰以帝在外心憂惑謂已亟去不爲備楚琳夜率其黨王汾李卓牛僧伽等作亂齊映自賣出齊抗託備皆免鎰縋城走不及遠與二子爲候騎所執楚琳殺之屬官王沼張元度柳遇李淑皆死詔贈太子太傅唐書○按前傳齊邱爲後胤孫則鎰乃曾孫此云五世孫疑有誤

宋

龔識字默甫其先邵武人父慎儀仕南唐爲給事中使南漢被執漢亡拜歙州刺史南唐滅爲盧絳所害識始徙居吳登端拱元年進士大中祥符間翰林學士李宗諤薦擢監察御史屬眞宗東封護蹕還都遷殿中侍御史

兼左巡使宋龔唐制御史不專言職至是始擇學術醇
正操履端方可綱紀朝廷者俾入臺言事識乃被選踰
年以目疾求退除檢校司封郎官平江軍節度副使宋

之吳士登科自識始

按范成大吳郡志龔寓居吳城與弟姪先後登第龔明之中吳紀

聞云崑山在國初無登第者郊廩獨破天荒則識實郡人至子宗元始家崑山耳然凌萬頃志科第人物首先

載識萬頃本宋人當有所據明方鵬崑山志列入政績蘇州府志亦以識為崑山人存之以俟考

龔宗元字會之識子幼穎悟為鄉貢首選天聖五年擢進
士主仁和簿以父疾乞便侍養調吳縣服闋改建安尉
藹有聲稱薦章保任者二十有二召見擢大理丞知句
容縣發摘奸伏如神明楊紘持節行部號為深酷獨不
入宗元境曰龔君治民所至有聲吾往徒為擾耳歷通

判衢越二州官至都官員外郎謝事歸居黃姑村取白

居易詩中句作中隱堂時程適陳之奇皆以耆德致政

日為文酒之樂吳人謂之三老初官仁和時知州范仲

淹深加禮重稱其文溫厚和平而不乏正氣似其為人

謂曰君德業清修他日必為令器慎勿因人以進洎登

朝未嘗游公卿門卒以清直淳厚號慶厯人材

郊直字正夫居崑山之太倉本農家子嘉祐二年登進士

授睦州團練推官知於潛縣未赴熙寧三年詔天下陳

理財省費興利除害之策直自廣東安撫司機宜文字

為書條陳吳中水利言治水治田之法甚悉王安石善

之五年授司農寺丞提舉興修兩浙水利議者以為不

便罷歸治所居之西水田曰大泗讓者如所陳之說爲
圩岸溝澮塲圃俱用井田之法歲入甚厚圖狀以獻且
以明前法非苟然者復召爲司農寺簿遷丞預修本寺
制式頗號完密除江東轉運判官元祐初入爲太府丞
出知溫州以比部郎中召未至卒年六十六有吳中水
利書行世其說見水利亶子僑字子高一字喬年負才
挺特鄉里推重謂之郝長官嘗爲王安石所器許見之
於詩有幼成警悟集行世亶孫升卿字師古由進士知
常徽二州乾道六年自徽代還奏蠲本州額外創科雜
稅一萬二千餘緡及元認江東兩浙運司諸處絹一萬
六千六百餘匹其勤卹民隱類如此

孫載字積中曾祖漢英錢氏時爲崑山鎮防遏使遂爲縣
人父偁官至通議大夫發運大使載登治平二年進士
爲河中府戶曹更三守皆立威嚴載獨與爭曲直不肯
詭隨守終薦之中書檢正官察訪關中辟爲官屬乾祐
縣令不肯奉行青苗法檄載按之載言邑小民貧歲以
黍麥博易爲生未知稱貸公家爲利令無罪不當按用
薦知德清縣以德化民不任刑罰訟有累年不決者得
一言皆感悟去熙寧八年吳越饑獨縣中熟載勸大家
倍糴得十五萬斛明年春米價翔湧載使平直以糶全
活甚衆移考城縣一日巡尉來告盜集境上將以上元
夜掠近郭至期載張燈設宴不禁夜盜叵測遽去訖受

代無復盜者神宗以載姓名付中書除廣東常平觸暑行部以宣德意元祐初通判陝州遷廣東轉運判官紹聖初除河北西路常平改知海沂二州延聘名儒興學養士遷朝奉大夫知婺州除河東轉運判官移淮西提點刑獄建中靖國初遷朝請大夫知亳州所至務持大體號循吏以嘗薦元祐黨人丐閒授提舉洞霄宮大觀中以朝議大夫致仕一日徧謁先壠及嘗往來者未幾疾革問日早宴盥水焚香而逝年七十五載天資樂易好汲引士類受薦者至四百餘人後多知名

王葆字彥光祖申以學行推於鄉父億樂道好善贈右中散大夫葆弱冠通諸經宣和六年擢進士第崑山自孫

載登科後六十年葆始繼之初主麗水簿紹興改元上疏陳十弊深中時病未言儲嗣尤切直謂仁宗時中外晏然而范鎮等爲國遠計汲汲在此况今國步多艱人心易動強虜未靖羣盜陸梁天下之勢危若綴旒而甲觀之崇未聞流慶中外惴恐此爲甚急願陛下爲宗社計廣求宗室中仁明孝友時論所歸者厯試諸事以繫人心執政讀而奇之遷知宜興縣時兩淮用兵浙亦盜起邑當孔道寮吏懼乏軍輸相次駭竄葆白父母食君祿無愛死理弟可終養母以葆爲念也明日取丞簿印兼佩之諸將妄求輒面折乃稍稍自戢厯登聞檢鼓院宗正寺丞遷司封郎中兼玉牒所檢封官居喪服闋權

考功兼國子司業秦檜嘗語葆曰檜欲告老何如葆曰
此事不當問葆檜曰他人不敢言以公有直氣故問葆
曰果欲告老不問親讎擇可任國家之事者使居相位
誠天下生民之福檜默然拜監察御史崇政殿說書當
是時百司莫敢可否葆爲考功御史獨伸滯直枉當官
不避天子議置相人懷向背葆獨介然持正論出知廣
德軍移守漢州綏善鋤姦境內大治擢瀘南安撫使知
瀘州引用名士劾去貪殘吏數輩然後鎮以無事逾年
遷池州孝宗召爲大理少卿以疾辭道改浙東提點刑
獄屢行帥事疾惡彌厲權要皆不樂乃請祠主管台州
崇道觀終老宜興官至左朝請大夫葆學行俱高潛心

古道教誘後生如親子弟沙隨程迥嘗受經於葆出其
門者後多成立其學深於春秋於人物鑒裁尤精李衡
布衣流落一見以女弟歸之周必大未第時亦妻以女
范成大早孤廢業葆喻勉切至留家塾程課甚嚴後皆
爲名臣弟萬進士子嘉言監南嶽廟嘉賓知餘干縣

范成大字致能吳郡人紹興二十四年擢進士第授戶曹
監和劑局隆興元年遷正字累遷著作佐郎除吏部郎
官言者論其超躐罷奉祠起知處州陞對論力之所及
者三曰日力曰國力曰天力今盡以虛文耗之上嘉納
處民以爭役囂訟成大爲創義役隨家貧富輸金買田
助當役者甲乙輪第至二十年民便之其後入奏言及

皇朝內閣總纂修 卷二十一
此詔頒其法於諸路處多山田梁天監中詹南二司馬
作通濟堰在松陽遂昌之間激溪水四十里溉田二十
萬畝堰歲久壞成大訪故跡疊石築防置隄闊四十九
所立水則上中下溉灌有序民食其利除禮部員外郎
兼崇政殿說書乾道令以絹計贓估價輕而論罪重成
大奏承平時絹匹不及千錢而估價過倍紹興初年遞
增五分爲錢三千足今絹實貴當倍時直上驚曰是陷
民深文遂增爲四千而刑輕矣隆興再講和失定受書
之禮上嘗悔之遷成大起居郎假資政殿大學士充金
祈請國信使國書專求陵寢蓋汎使也上面諭受書事
成大乞併載書中不從金迂使者慕成大名至求巾幘

效之至燕山密草奏具言受書式懷之入初進國書詞
氣慷慨金君臣方傾聽成大忽奏曰兩朝旣爲叔姪而
受書禮未稱臣有書措笏出之金主大駭曰此豈獻書
處耶左右以笏擿起之成大屹不動必欲書達旣而歸
館所金主遣伴使宣旨取奏成大之未起也金庭紛然
太子欲殺成大越王止之竟得全節而歸除中書舍人
初上書崔實政論賜輔臣成大奏曰御書政論意在飭
綱紀振積弊而近日大理議刑遞加一等此非以嚴致
平乃酷也上稱爲知言張說除簽書樞密院事成大當
制留詞頭七日不下又上疏言之說命竟寢知靜江府
廣西窘匱專藉鹽利漕臣盡取之於是屬邑有增價抑

配之弊詔復行鈔鹽漕司拘鈔錢均給所部而錢不時至成大入境曰利害有大於此乎奏疏謂能裁抑漕司強取之數以寬郡縣則科抑可禁止從之數年廣州鹽商上書乞復令客販宰相可其說成大出銀錢助之人多以爲非下有司議卒不易成大說舊法馬以四尺三寸爲限詔加至四寸以上成大謂互市四十年不宜驟改除敷文閣待制四川制置使疏言吐蕃青羗兩犯黎州而奴兒結蕃列等尤桀黠輕視中國臣當教閱將兵外修堡砦仍講明教閱團結之法使人自爲戰三者非財不可上賜度牒錢四十萬緡成大謂西南諸邊黎爲要地增戰兵五千奏置都監路分吐蕃入寇之路十有

八悉築柵分戍奴兒結擾安靜砦發飛山軍千人赴之料其三日必遁已而果然白水砦將王文才私娶蠻女常導之寇邊成大重賞檄羣蠻使相疑貳俄禽文才以獻卽斬之蜀北邊舊有義士三萬本民兵也監司郡守雜役之都統司又俾與大軍更戍成大力言其不可詔遵舊法蜀知名士孫松壽年六十餘樊漢廣甫五十九皆掛冠不仕表其節詔召之皆不起蜀士由是歸心凡人才可用者悉致幕下用所長不拘小節其傑然者露章薦之往往顯於朝位至二府召對除權吏部尙書拜參知政事兩月爲言者所論奉祠起知明州奏罷海物之獻除端明殿學士尋帥金陵會歲旱奏移軍儲米二

十萬振饑民減租米五萬水賊徐五竊發號靜江大將軍捕而戮之以病請閒進資政殿學士再領洞霄宮紹熙二年加大學士四年薨成大素有文名尤工於詩上嘗命陳俊卿擇文士掌內制俊卿以成大及張震對自號石湖有石湖集攬轡錄桂海虞衡志行於世宋史成大之先本居郡中父雱字伯達始徙崑山登宣和進士終秘書郎成大在懷抱中已識屏間字年十二徧讀經史十四能文辭父亡讀書薦嚴寺十年不出父友王葆課以舉業登第後以文學才氣爲上所知使金時上臨遣之曰卿氣宇不羣朕親加選擇聞外議洵洵官屬皆懾行成大對曰無故遣汎使近於求豐不執則戮臣已立

後區處家事爲不還計心甚安之上爲愀然使金還金報書有抑聞附請之辭欲變受書之禮出於不意要以必從之語上由是知其忠勁有大用意上欲用知閣門事樞密都承旨張說爲簽書也成大既留詞頭請對出制草納榻前上色遽厲成大徐奏曰臣願引喻以聞今朝廷尊嚴雖不可下擬州郡然分之有別大小畧同閤門官日日引班乃今郡典謁吏耳執政大臣倅貳比也一旦州郡驟拔客將吏爲通判職曹官顧謂何耶官屬總俛首吏民觀聽又謂何耶上霽威久之竟寢前命成大天姿俊朗輔以博學爲文瞻麗清逸所歷名藩興利除害不顧難易所在鼓舞之以大學士知太平州納祿

歸封吳國公卒贈少師追封崇國公諡文穆

顏度字魯子充公五十三世孫自唐魯公真卿兄子顥爲常熟令其後遂爲吳人度居崑山以文章政事名一時登紹興進士第歷海門簿臨海令皆有去思乾道五年知長興縣遇事慈恕人不忍欺其聽訟於涇樸中時出智計以得其實一日某王自寧國入朝舟次縣界皆以婦女挽羈王怪問之答云知縣顏佛子愛惜民力縱男子耕種卒難召集恐累顏公故婦女悉來當役洎入對具言其事召拜監察御史遷軍器監司農宗正太常少卿權工部侍郎直寶文閣江東福建運副知湖州江東京西運副以中大夫秘閣修撰提舉冲祐觀封長洲縣

開國男卒年七十五度與朱熹友善孝宗謂度每出一言不動如山因以如山自號云弟愿子叔平姪叔玠叔瑤叔淵皆及第叔珙叔璵皆奏名後遂世居邑城

鄭興裔字光錫初名興宗顯肅皇后外家三世孫也曾祖紳封樂平郡王祖翼之陸海軍節度使父蕃湖州防禦使興裔早孤叔父藻以子字之分以餘貲興裔不受請立義莊贍宗族及藻沒遂解官致追遠之義初以后恩授成忠郎充幹辦祇候庫聖獻后葬充攢宮內外巡檢累至江東路鈐轄乾道初建康留司請治行宮備巡幸興裔奏勞人費財乞罷其役且言都統及馬軍帥皆非其人徒福建路兵馬鈐轄過闕入見詢以守令臧否興

崑山縣續修志 卷二十一
裔條析以對帝曰卿識時務習吏事行當用卿會復置武臣提刑就命爲之加遙領高州刺史郡縣積玩檢驗法廢興裔創爲格目分畀屬縣吏不得行其姦因著爲令建劍汀邵鹽筴屢更漕臣請易綱運爲鈔法興裔極言其不可海寇倏去倏來調兵常無及興裔請置澳長寇至徑率民兵禦之又言禁兵事藝不精多充私役乞行禁止尉以捕盜改秩多僞當加審實帝善其數論事詔加成州團練使時傳聞金欲敗盟召興裔爲賀生辰使以覘之使還言無他卒如所料累差浙東浙西江東提刑請祠以歸尋詔知閤門事兼幹辦皇城司又兼樞密副都承旨軍婦楊殺鄰舍兒取其臂釧而棄其屍獄

成刑部以無證左出之命興裔覆治得實帝喜賜居第丁母憂去官服闋復故職除均州防禦使再使金還遷潭州觀察使復請祠起知廬州移知揚州揚與廬爲鄰初興裔在廬嘗卻鄰道互送禮至是按郡籍見前所卻者有出無歸遂奏嚴其禁揚有重屯糧乏例糴他境興裔搜括滲漏以補之食遂足民舊皆茅舍易焚興裔貸之錢命易以瓦自是火患乃息又奏免其償民甚德之修學宮立義塚定部轄民兵升差法郡以大治楚州議改築城有謂韓世忠遺基不可易者命興裔往視既至掘地丈餘增築之帝閱奏喜曰興裔不吾欺也紹熙元年遷保靜軍承宣使召領內祠充明堂大禮都大主管

大內公事寧宗卽位除知明州兼沿海制置使告老授武泰軍節度使卒年七十四贈太尉諡忠肅與裔歷事四朝以才名結主知中興外族之賢未有其比子三人挺以橫行團練使歷淮襄兩道帥損登進士甲科與抗皆有位於朝按宋史與裔與族祖億年始遷居崑山周必大爲銘其墓范之柔字叔剛仲淹四世孫純祐曾孫贈中奉大夫公武之子自郡徙居崑山乾道八年進士嘉定初拜監察御史歷右正言左司諫起居中書二舍人刑禮二部尙書太子詹事封崑山縣開國子之柔奉君事親一以仲淹爲法知止畏盈每有山林之志最後累章乞骸骨上諭宰臣曰爲朕勉留將大用之以通議大夫禮部尙書致

仕卒贈特進開府端明殿學士諡清憲子克家寧家寧家官奉議郎

衛涇字清叔其先齊人唐末避亂南遷居華亭祖闡始占籍崑山之石浦父季敏通判鎮江府涇少有異操從永嘉李去智學李卒爲制服執喪人咸義之淳熙十一年擢進士第一授承事郎添差鎮東軍簽判涇以對策嘗陳添差之弊三上表乞待次上以涇力踐所言特從其請故事狀元初任垂滿必通謝於宰執始頒召命時王淮秉政涇不通謝雖被召三月不得引見十四年除秘書省正字輪對言陛下卽位之初銳意事功不次用將相痛憤以圖恢復乃二十六年之久無一事足以少稱

皇朝同治庚午年... 卷二十一
陛下意者而陛下大有爲之志亦少弛矣一祖八宗之業太上皇付託之重子孫億萬年之基緒陛下一身任之豈可僅取苟安無事而已耶庸常之材持祿保身而風俗日壞士氣日卑民生日困臣恐天下之患將有出於意慮之外者事幾易失時不再來願陛下堅自強之志振紀綱以張國勢作氣節以厲媮惰則靜可以強根本動可以復疆土而事功立矣光宗初立政尙修謹涇以著作佐郎賜對言今日風俗頹靡百度縱弛人才削弱國勢未張汲汲有爲尙恐不濟若猶因循其弊將不可爲又言中國之與金其勢決不能兩立名爲和好實則讐敵名爲息兵實則觀釁復讐之志直須時耳今以

偏方之勢與金持久自紹興來五十年無大戰自隆興來三十年無小鬪間隙之生遠不過五六年耳願陛下奮發英斷規恢遠圖臥薪嘗膽不忘北鄉聖志先定然後與二三重臣講求大計委任而責成之內治外備則大讐可復中興可期矣又言自陛下踐阼臺諫給舍多不得其職今日士氣向衰風采銷落陛下所當長養振作而反陰消潛沮之將使羣臣上懼陛下之威命下虞羣小之中傷苟且成風諂諛充位脫有大奸巨惡誰爲陛下言者紹熙元年遷著作郎兼司封郎官二年正月震雷雨電大雪繼作涇應詔上封事言雷陽也雪陰也陽氣方升而陰制之此雪所以降也以象類而求則君

皇朝兩縣續修志 卷二十一
欺於臣夫陵於妻夷狄謀中國小人害君子皆陰勝之
證也有一於此皆能致亂陛下不可不預防也時佞倖
漸肆李后悍妬故涇以爲言出爲淮東浙東二路提舉
慶元初召爲尙右郎官上殿論壽皇孝養禮曠以爲太
上之於陛下親父子也天性之愛血氣之屬慈孝之心
宜無毫髮疑問雖太上疾勢未平語言舉動若未容於
進見者然陛下孝心純篤豈以吾親之不可見而遂已
乎臣聞參天地贊化育曰誠而已金石之無情鬼神之
至幽猶以誠而能動矧人子之事親誠極其至焉有不
能感動者乎願陛下兢業於中以親之未順爲憂以期
於見親爲念積此誠意庶幾太上之懽心可得而喜付

託之得人矣三年以起居舍人假工部尙書使金國還
言金有危亡之兆而吾無自治之策使吾治具畢張備
禦無闕敵雖強不足畏倘偷安歲月僅了目前一弱寇
滅一強敵生猶未足以爲喜也初涇奉詔時帝諭使覘
彼國勢而金爲蒙古所攻我有乘釁之意涇深懼其輕
動故還奏如此除直煥章閣知慶元府沿海制置使以
言者論罷是時權姦用事涇不爲勢怵斥去十年不調
於里中闢西園取前賢范仲淹語名其堂曰後樂自號
後樂居士開禧元年得旨入朝明年除中書舍人兼直
學士院應詔論北伐非計三年自吏部尙書拜御史中
丞請誅韓侂胄論罷陳自强拜參知政事封崑山縣開

國伯嘉定初兼太子賓客始侂胄之誅涇功居多既又
患史彌遠有專恣之漸欲去之彌遠知涇謀諷御史劾
罷之五年出知潭州八年知隆興府上以涇三世同居
有堂曰友順御書二大字太子亦書後樂堂榜賜之九
年知揚州十七年除資政殿學士金紫光祿大夫致仕
進封吳郡開國公寶慶二年卒理宗輟視朝一日特贈
太師追封秦國公諡文節涇歷仕三朝出入內外四十
餘年憂國忘家始終一節謀深慮遠不邀近功其進退
之際與時升降嘗語人曰官職自有定分名誼千古不
磨故其在朝孤立自守不畏強禦以賢才爲立國之基
薦進搜舉汲汲如不及如李燔輔廣倪思陳韓皆其人

也在潭時與朱熹有交承之好侂胄指熹爲僞學斥之
侂胄死涇奏召熹還朝而熹已卒復移文新安取熹諸
經四書傳註刊刻以傳又請爲張栻賜諡表章正學其
功尤多從兄沂慶元五年進士奉化主簿從弟洙治並
嘉定元年進士洙官右司郎中同產弟湜別有傳子四
樵魁銓闈又魁鎖廳終知信州樸中鎖廳終倉部郎官
樛魁國子終太社令枏魁銓闈中鎖廳通判婺州

鄭準字器先本開封人華原郡王居中曾孫建炎三年鄭
氏舉宗隨駕南遷居中子修年億年僑年奉母越國太
夫人居崑山之通德坊億年官資政殿大學士卽準之
祖也父臨朝議大夫知廣德準由居中蔭補魁銓闈登

崑山縣開國男
慶元二年進士。歷知袁州。終中奉大夫。崑山縣開國男
準生。王侯家氣象。若儒素薄於功名。厚於道義。輕財好
客。赴人之急。買田贍族。有高平范氏義莊之風。子竑。埃
孺。孺。歷淮東提刑。知高郵。所至以廉稱。姪端。竦。端。中鎖
廳。竦。知泰。邵。韶。三州。奉祠。里居。九謙和樂。易不與物忤。
陳貴誼。字正夫。福州福清人。慶元五年進士。授瑞州觀察
推官。丁內外艱。服除。調安遠軍節度掌書記。辟差四川
制置司書寫機宜文字。中博學宏詞科。授江南東路安
撫司機宜文字。遷太社令。改武學。諭國子錄。遷太學博
士。時議更楮幣法。貴誼轉對言。人主令行禁止者。以同
民之所好惡。楮券之令。乃使姦惡獲逞。道路咨怨。非所

以祈天永命。固結人心。因援熙寧新法爲辭。又言。明銳
果敢之才。足以集事。而失於剽輕。老成寬博之士。足以
厚俗。而失於循理。孰若舉之以衆取之。以公主更幣之
法者。乃摘新法等語。激怒時相。且謂貴誼引類植黨。人
爲危之。遷太常博士。以兄貴謙兼禮部郎官。引嫌。遷將
作監丞。兼魏惠憲王府小學教授。轉對謂。言路雖開。觸
犯忌諱者。指爲好名。切劘時政者。指爲玩令。利害關於
天下。是非公於人心。一人言之未已。或至累十數人。言
之則又指爲朋黨。是非易位。忠佞不分。史彌遠益不樂
遷。秘書郎出知江陰軍。提舉江西常平。召赴行在。未至。
授禮部郎官。屬金人大擾。淮甸貴誼言。人才所以立國。

皇朝兩朝通志 卷二十一
今旁蹊曲徑倖門四闕言路所以通下情今媿阿循默
囊括不言民力已竭而科歛之外餽遺以謀進者未已
軍中恥言敗北則陣亡者不卹恥言棄潰則逃竄者復
招又言婉順巽從者是災疾也非愛我也宜屏之外之
矯拂抹正者是藥石也愛我也宜用之聽之彌遠滋不
樂諷言者論罷主管崇禧觀起知徽州召授司封郎官
兼翰林權直兼玉牒所檢討會有事明堂乃首引包拯
皇祐中乞因肆赦除聚斂培克之弊當察州縣府庫致
羨之由做成周邦饗必及死王事者之子與漢置羽林
孤兒專取從軍死事之後教以五兵理宗卽位以爲宗
正少卿兼侍講兼權直學士院尋遷起居舍人寶慶初

詔舉賢能才識之士貴誼上言曰世以容默滯固爲賢
以苛刻生事爲能以褊狹趣辦爲才以輕疏嘗試爲識
及茲初政當求忠實正直奉公愛民知禮義廉恥而不
越防範者以充中外之選又言成王之初元臣故老警
以無逸者欲其克壽勉以敬德者欲其永命期以豈弟
者欲其受命之長則可謂愛君切而慮患深矣遷中書
舍人升兼直學士院內侍濫受恩賞輒封還詔書將郊
貴誼以民生實艱吏員尙衆征歛幾於奪取公費掩爲
私藏宜大明黜陟庶有以見帝於郊遷禮部侍郎仍兼
中書舍人權刑部尙書升修玉牒官兼侍讀爲禮部尙
書兼給事中端明殿學士簽書樞密院事紹定六年冬

上始親政進參知政事上面諭之曰頃聞憂國之言朕

所不忘兼同知樞密院事出師汴洛時貴誼已移疾猶

上疏力爭五上章乞歸轉四官加邑封致仕卒贈少保

資政殿大學士宋史貴誼父宗召字景南贊崑山侍御史

邨再遷黃巷諸登進士中宏詞科終禮部尚書兄貴謙

字益夫以宏詞官秘閣修撰尚左郎官貴誼諡文定

趙緝字君善紹興宰相鼎之曾孫父監字儒文贅范之柔

女兄遂家崑山終知興國軍緝登嘉泰二年進士為常

州教授作亭表鄒浩墓歷宗正寺丞都官郎中理宗欲

用為諫官有沮之者出知吉州不赴丐祠歸後除直秘

閣進直寶章閣以朝散大夫致仕題其居曰頓菴又自

號如舟清修寡欲室無媵妾讀書至老不倦藏書萬卷

手自校讐預為墓志卒前一日尚與賓客論文是夜儻

然而逝年七十八子序孫勲俱世其美

王圭字君玉范成大外孫也父邁字德遠安吉人以贅居

崑山登乾道進士第通判太平州圭登嘉定十年進士

主松陽簿以才幹陞為令講行經界版繪其式制行天

下淳祐八年以監行在諸司糧料院出知常州屢蒙陞

賞十年又以職事修舉轉朝奉大夫再任在官五年入

為司封郎官終朝散大夫圭幼孤貧力學孝於其母其

居官廉家無餘貲自號靜觀子敏學彊學以蔭補官皆

稱廉謹

劉必成字與謀其先福安人來居崑山之湓浦必成少游國學嘉熙元年七士同叩闈極言時事必成實爲之倡是年七士俱預計偕而必成爲武舉解元明年遂魁天下淳祐九年復中鎖廳蓋以文武全才自負也嘗兩入閣輪對慷慨言邊事上深褒美次日宣諭宰臣曰必成所言極好後皆行之歷守清潯終湖南安撫副使自號愛閒翁

陳昌世號澹軒太府丞振養子幼以文名兼優吏事三中鎖廳由太府丞知信州治最擢吏部郎中召見理宗有一廉可喜之褒後知瑞州所至有善政以節用愛人爲本遷朝散大夫中歲絕欲自奉菲薄子師尹魁鄉薦次

明復魁銓闈中鎖廳宰象山四年士民嘗借留於朝終通判慶元府

元

于文傳字壽道平江人祖宗顯宋承信郎父雷龍鄉貢進士宗顯之先世以武弁八官而力教其子以文易武故雷龍兩舉進士宋亡不及仕及生文傳乃名今名以期之文傳少嗜學十歲能屬文未冠已有聲譽用舉者爲吳及金壇兩縣學教諭饒州慈湖書院山長仁宗詔舉進士文傳首登延祐二年乙科授同知昌國州事累遷長洲烏程兩縣尹陞婺源知州又知吳江州文傳長於治劇所至俱有善政自其始至昌國卽能柔之以恩信

於是海島之民雖頑獷不易治至有剽掠海中若化外
然者亦爲之變俗初長官強復自恣文傳推誠以待之
久乃自屈服鹽場官方倚轉運司勢虐使州民家業破
蕩文傳語同列曰吾屬受天子命以牧此民可坐視而
弗之救乎乃亟爲陳理上官莫能奪民賴以免長洲爲
文傳鄉邑文傳徙榻公署未嘗輒出而親舊莫敢通私
謁會創行助役法凡民田百畝令以三畝入官爲受役
者之助文傳旣專任其縣事而行省又以無錫州及華
亭上海兩縣之事委焉文傳諭豪家大姓以腴田來歸
而中人之家自是不病於役其在烏程有富民張甲之
妻王無子張納一妾於外生子未晬王誘妾以兒來尋

逐妾殺兒焚之文傳聞而發其事得死兒餘骨王賄妾
之父母買鄰家兒爲妾所生兒初不死文傳令妾抱兒
乳之兒啼不就乳妾之父母吐實乃呼鄰婦至兒見之
躍入其懷乳之卽飲王遂伏辜丹徒縣民有二弟共殺
其姊者獄久不決浙西廉訪司俾文傳鞫之旣得其情
其母乞貸二子命爲終養計文傳謂二人所承有輕重
以首從論則爲首者當死官司從之婺源之俗男女婚
聘後富則渝其約有育其女至老死不嫁者親喪貧則
不舉有停其柩累數世不葬者文傳下車卽召其耆老
使以禮訓告之閱三月而婚喪俱畢宋大儒朱熹上世
居婺源故業爲豪民所占子孫訴於有司莫能直文傳

諭其民以理不煩窮治而悉歸之復募好義者卽其故宅基建祠俾朱氏世守焉有富民江丙出遊京師娶娼女張爲婦江旣客死張走數千里返其柩以葬前妻之子困苦之旣而殺之瘞其屍山谷間官司知之利其賄不問文傳乃發其事而論如法文傳莅官其所設施多此類故其治行往往爲諸州縣最韓鏞時僉浙西廉訪司事作烏程謠以紀其績論者謂其有古循吏之風至正三年召赴闕承詔預修宋史書成賞賚優渥仍有旨四品以下各進一官擢文傳集賢待制亡何以嘉議大夫禮部尙書致仕卒年七十八文傳氣貌充偉識度凝遠喜接引後進考試江浙江西鄉闈所取士後多知名

爲文務雅正不事浮藻其於政事爲尤長云元史文傳之

先世爲汴人五世祖武節大夫恭扈從南渡僑居吳文

傳徙崑山知長洲縣時縣稅糧四十餘萬訟牒盈案文

傳聽決如流催科不擾在烏程日以胡安定墓域被侵

爲清修復之孫淵字資深以上見葉奕苞志稿按元史本傳文傳爲平江人而元總

管高德基平江紀事云于文傳崑山人方鵬志遂列入選舉表前人頗以傳內長洲爲文傳鄉邑句疑爲郡人然德基元時人所紀必有確據奕苞所載亦非無因今仍之

施文勝字文質性聰敏博學有識好善知禮爲時所稱北

遊大都謁馬札兒台見其儀狀雄俊才識明達薦於朝

拜集賢院學士左遷利州監經歷未幾復前官進階都

水少監卒贈中奉大夫集賢院學士吳興郡侯

明

顧禮字元禮洪武五年以人材徵官刑部員外郎八年上特擢本部侍郎九年以家人坐極刑免官十一年再徵為戶部侍郎明年進尚書改刑部時方用重典司寇尤為大任禮謹職守法未嘗少濫未幾卒官

按禮之行實紀載無所考見然當明祖之時廢而復起且游膺重任鄉先賢顧潛云其人必淳厚質直否則安能保令終也

余焯字茂本少從殷奎陳潛夫學得春秋之傳洪武十年以明經試入太學授承敕郎十五年進通政司參議轉奉議大夫試左通政十七年拜吏部尚書奏准來朝官明年正旦各造事蹟文冊仍畫土地人民圖以十二月二十五日至京惟雲南遠邊特免又立吏員撥用法會

學錄金文徵畏祭酒宋訥嚴與同官田子貞等誣訥罪嗾焯移文令致仕訥陛辭上驚問故焯與文徵皆賜死焯為人長者嘗以試通政居憂出入不御輿馬父故鑷工每造謁鄰曲輒自稱余待詔兒生平未嘗譖毀人每進見微有所寬釋乃為文徵所誤聞者傷之

朱吉字季寧原名逢吉太祖御筆改單名其先睢陽人宋兵部郎中貫九世孫高祖子榮避亂南奔居吳郡父德潤字澤民幼工詩文兼精畫理元延祐末趙孟頫薦為國史編修英宗時授鎮東儒學提舉告歸至正中起江浙行省參謀官攝長興守以病免詳具蘇州府志傳吉幼喪母值元季兵亂奉父周旋患難張士誠據吳游士

多苟從之惟吉不少降志崑山州判徐石麟妻以女因自郡徙崑讀書樂道名其齋曰三畏洪武二十五年以能書薦入中書又二年擢戶科給事中時糧長稽違勘合皆坐死籍沒吉疏言勘合雖違而稅糧已足乞減死從之二十九年詔清胡藍逆黨告訐紛然吉上言請宥矜疑以安反側上宣諭褒美有金織綺衣之賜自是無告密者尋改中書舍人遷翰林院文翰館侍書供奉內廷者十年擢湖廣肅政按察司僉事建文末以次兄復吉被譴連坐逮繫成祖登極復召入中書奉敕改題高廟神主眷賞特厚告歸篋中惟法書名畫路遇故人負租抵罪即鬻以償之年八十一卒吉之學以聖賢爲師

謹言慎行處已待人表裏一致子定安泰安永安

龔詈字叔言宋侍御史猗七世孫幼讀史記未而歲誦如懸河人或試之盡卷不錯一字洪武十一年以春秋應文學科薦授岳州學正所得俸錢推贍二兄齋厨索然諸生有以通鑑贄者詈受覽卒業卽封還之日已拜貺矣數年岳州陞爲府詣闕候調與守偕入見上問守一切民情物力守震懼莫對詈舉止巖然上顧曰是官何爲者對曰臣岳州學官因代守條對甚悉上喜拜兵科給事中尋超爲科長後以言事忤旨籍其家僅賜絹二疋上色動乃謫戍五開衛不一年卒幼子翹張大復曰龔氏家乘不詳載疏中語但云以易儲事豈有所諱耶王志堅曰易儲事屬創聞余不敢從也

王英字俊伯宋朝請大夫葆八世孫洪武中以貢入太學授監察御史上察其可用命署都御史事大書敦厚王英四字揭之殿柱尋授刑部主事陞郎中母老乞養出知寧海縣永樂初召入復爲郎中擢陝西按察使丁母憂服除改山西秩滿仍命治陝已而得代行至泗州卒年六十三妻閻氏簡其橐不滿一金弗克還柩乃火而歸骨焉英立朝謹畏時有建白輒毀其稿及長臬司以簡靜爲治不事苛察居鄉九坦易嘗微服入郡時禁庶民服鞢門者縛英英笑曰我官人也取舟中冠帶示之得釋亦不怒又嘗行道有負鹺者並道行擠英墮水怡然攝衣起他日復遇於道其人棄所負卻走英召而慰

遣之邑令設盛饌邀飲辭之而赴鄰翁飯或問之曰鄰翁貧治具不若令之易也鄉里傳爲美談孫廷綱字成憲以薦授樊府教諭歷秀水定海兩邑清謹有祖風卒年九十六廷綱子于石字介之以薦授太醫院御醫王遜字謙伯洪武十八年進士授上高縣丞坐望誤戴罪殺賊一日獲九十九人械繫之法不滿百不奏左右欲以他囚足之遜叱曰殺人邀功我不爲也未幾果得巨寇寇平功最多在縣蒞事明敏剖決如神召拜江西道監察御史爲人剛毅峭直持憲度律已凜然如臨嚴賓或勸其稍自降抑遜曰吾讀書求道已不能治安能治人每彈擊諫諍不知忌諱號真御史後因事直諫上大

怒遜求去詔許之已又召還遜乃服金屑死年三十二子復字從道宣德五年進士授行人司副遷南京御史耿直類其父人稱小御史坐事戍遼陽病卒復子曰敏字仁功少善屬文十六就童子試御史欲與餼以非分辭大奇之成化間由貢任石門訓導正身立教士皆向學致仕歸安貧守志杜門讀書所爲詩詞古文皆醇正有法度

虞祥字仲禎宋宰相允文之裔祖樂間元海道萬戶始居崑之太倉父茂洪武中以間右實京師永樂辛卯祥以上元籍領鄉薦明年會試乙榜授金華訓導遷上虞教諭宣德中擢禮科給事中尋掌科事慶壽寺僧覺貴構

中使創造毘盧閣高數十丈僭擬非度祥劾奏毀之置僧於法陞通政司左參議正統八年進戶部右侍郎改兵部巡視畿輔賑窮挫豪民賴以安又清武臣勲績綜理明覈爲士大夫所稱祥爲人謹飭持大體自校官至大臣所在咸著聲績卒於位賜祭葬祭酒李時勉銘其墓子震孫臣

劉璉字廷器永樂十年進士授陝西道御史論事無所避就權要憚之陞山東參議洪熙初上念邊將無文多疏脫議選方面參贊機務璉與沈固周顯劉紹同見任用參贊宣府軍務宣府故當阿魯台兀良哈出沒之處自黃花鎮抵大同平遠堡延袤一千二百餘里地勢荒落

身系內事紀傳卷二十一
三
墩堡耗廢璉督諸總兵官整理文書商榷機密修舉廢
墜漸致殷富宣德四年轉戶部右侍郎巡撫開平等處
就轉左侍郎累降敕褒獎璉公勤廉謹人不敢干以私
蔚州千戶張瑄挾恨奏之英宗怒寘瑄死在邊二十八
年終始如一己巳之變諸邊相繼陷沒獨開平八驛嬰
城固守卒賴保全其後都御史李秉督邊儲悉依璉法
景泰二年致仕卒於通州不能歸卽其地葬焉天順三
年葉盛參政山西奏璉在邊年久保障有功乞恩褒卹
詔賜祭一壇遷葬馬鞍山下

周璫字季溫少從司訓林鐘受春秋遂通三傳永樂九年
領鄉薦授烏程教諭歷臨江南昌二府教授方嚴有師
法與諸生講誦夜分乃已以大臣薦爲都察院照磨尋
拜監察御史所奏記多軍國重務侃然正色不避權要
當道忌之遷鄭府長史卒於官弟璣卽尙書倫曾祖從
兄弁字景星宣德中由歲貢理淮揚鹽筴搜剔奸利商
人畏服授四川蒲江知縣縣故臨邛地土風囂雜不可
治弁一待之以明恕與之休息憂歸服闋補閩之連江
治之如蒲引年罷歸璫子瓚以薦官廣寧衛教諭

王永和字用節祖允吉字吉卿元季嘗行陰德於里永和
少有至性父子禎病伏枕十八年侍湯藥無少懈永樂
甲午薦於鄉明年中乙榜念母老遂就選嚴州訓導嚴
士易其年少執經相難永和隨口剖析聞者翕服改訓

饒州大成殿圯請於守守難之永和曰公不見里巷孺子始就外傅卽知尊禮夫子豈有發身科第反不知本耶守愕然立爲修葺秩滿試吏部尙書蹇義奏爲兵科給事中劾奏錦衣衛指揮馬順不法事又論薊州都督王彘縱寇俱不報持節冊封韓王世子妃糾中官蹇傲罪直聲大振正統六年進都給事中明年陞工部右侍郎時方營建宮殿及諸司廨署役煩政殷處之裕如八年淮右旱蝗受命往撫會揚州以風雨潮溢漂沒沿江諸沙死者千餘人親爲賑卹收瘞全活甚衆十三年河決於汴潰而東注徐呂二洪涸妨漕運命永和往理永和濬黑洋山西灣引水以資運河築沙灣堤置分水閘

以洩上流運得以濟十四年從駕至土木死之年五十九贈資善大夫工部尙書諡襄愍永和器宇宏廓威儀莊重博學強記爲詩文清麗條暢子汝賢大理評事汝敬天順己卯舉人汝霖正統戊辰進士歷官吏科都給事中終河南右布政使奉公卹民仁厚有父風

吳凱字相虞父公式早亡遺腹生凱旣長力學養母里胥召之役詣縣自陳有志於學縣令芮翀異之立遣就學永樂中以能書赴京預修大典尋膺貢入太學中庚子順天鄉試宣德間授刑部廣東司主事改行在雲南司再改禮部主客司以母老乞歸遂致仕凱精敏有治劇才平生以禮自律言行不苟風儀嚴峻人望而畏之家

居四十年非公事不至公府自號冰蘖道人都御史李秉疏薦之不報侍郎葉盛嘗曰鄉里作官前輩當法吳相虞後輩當法孫蘊章及卒鄉人私謚貞孝先生子愈龔理字彥文宋侍御史猗十二世孫父賢字思齊少孤能自立好施與雖稱貸弗惜三子珩理琚皆樂施有父風理性方正沈毅宣德癸丑以鄉薦中乙榜詔賜冠帶與庶吉士同課翰林登正統丙辰進士授工部主事進郎中河決張秋已擢徐有貞督治又慎簡方岳大臣佐之廷推得理景帝曰是不要錢龔郎中乎遂超拜山東左布政使理至賑貸飢民參度地勢浚渠數百里置八閘以殺水勢河流旁溢作九堰障之又築大洪口漕路始

通乃勸學興禮撤毀淫祠表子貢墓而封祭之有同官簠簋不飭理峻詞規之其人卒爲改節景泰丙子中風疾告歸明年卒年五十一鄉人私謚曰清惠初賢嘗夢神人謂之曰上帝以汝有陰德與汝龔理已而理生初名璣及長里師爲更名理賢異之遂仍而不改長子紱字朝美成化七年鄉舉有文行官青縣教諭葉盛嘗言生子當如龔朝美自可不愧彥文後孫乾自有傳坤字敬承宏治戊午舉人

張和字節之少好學嘗病日夜讀遂眇其一正統己未與弟穆同以尙書舉禮部廷試擬第一上聞其目眇易置二甲第一乞歸益窮治經史景泰庚午聘主江西鄉試

旋授南京刑部主事法司有重獄輒經詳定爲尙書楊
寧倚重大理卿薛瑄勘所奏牘稱許尤至公退之暇閉
門讀書昕夕不輟嘗有以私謁者和變色斥之仍揜覆
不以告人以是人多憚服乙亥驛召入翰林分修宋元
通鑑綱目義例多出其手天順初還南京厯員外郎中
辛巳出爲浙江提學副使以身率士儀範肅然所較無
論多寡卽第甲乙人以大服甲申以疾歸旣革猶黜校
呂東萊大事卒年五十三浙人士跋涉千里臨其喪和
廉介端謹不一入權要之門聞忠義事喜如已出嘗曰
已廢一目又肩厚薄手大小足長短所至美而無醜者
獨此心耳生平以厚道自居每還家必祭其受業師嘗

過總憲陳鑑座有議人得失者和正色曰人當於有過
中求無過一座聳然

張穆字敬之文章與兄和頡頏宣德乙卯穆先舉於鄉不
肯赴公車曰兄弟齊名何有先兄一第者及正統戊午
和亦領鄉薦己未同登進士授行在工部主事改刑部
厯員外郎郎中讞議剖決明允無留滯天順改元擢山
東副使兼理學政維持公廉戢強遂善修復伯夷閔子
孔融張文忠狄仁傑祠墓訪孫復石介之後復其家歲
給衣食俾增廣儒學荏平修邑志斥華歆進馬周以崇
重名教爲務曾奉檄督糧儲之遼左悉去宿弊兵食羨
足而邊警有備成化初進浙江參政專理清軍故事勾

補軍伍率解丁就驗道多餓死穆但移文究覈無勾解之害兵民兩便之尚書李秉方擬薦穆會秉被劾詞連穆卽解官歸穆素廉既歸無以自給門人故吏爲買田淞江之澣卒年七十三

沈訥字文敏方季子舉正統七年進士授大理寺評事陞寺副景泰元年擢福建僉事督松溪銀冶絕侵漁革羨入戶民帖然盜起慶元入松溪界訥以計擒之得不滋蔓五年鄭懷冒復亂僞稱王號訥在政和得報卽集衆勦平之尚書孫原貞時鎮閩中上其功帝深嘉之天順二年就陞副使卒於官年四十六柩還之日閩人悲號遮道不能行訥身不踰中人而饒膽畧多智算每聽獄

兩喙爭譟片言折服少濡染兄愚及魯教爲文章有奇氣嗣子僎字希輔成化丙午舉人邃於古學未仕卒僎子世麟別有傳

葉盛字與中正統十年進士授兵科給事中師覆土木諸將多遁還盛率同列請先正扈從失律者罪且選將練兵爲復讐計郟王卽位例有賞賚盛以君父蒙塵辭不許也先迫都城請罷內府軍匠備征操又請令有司儲糧料給戰士遣散卒取軍器於天津以張外援三日間章七八上多中機宜寇退進都給事中言懲勸之道在明賞罰敢戰如孫鏗死事如謝澤韓清當賞其他守禦不嚴赴難不力者皆當罰大臣陳循等議召還鎮守居

庸都御史羅通并留宣府都督楊洪掌京營盛言今日之事邊關爲急往者獨石馬營不棄駕何以陷土木紫荆白羊不破寇何以薄都城今紫荆倒馬諸關寇退幾及一月尙未設守禦宣府爲大同應援居庸切近京師守之尤不可非人洪等旣留必求如洪者代之然後可以副重寄而集大功帝是之尋命出安集陳州流民景泰元年還朝言流民雜五方其情不一雖幸成編戶而鬪爭讐殺時時有之宜專官綏撫又言畿輔旱蝗相仍請加寬卹帝多採納京衛武臣及其子弟多驕情不習兵盛請簡拔精壯備操守京城勲戚所置市廛月徵稅盛以國用不足請籍其稅佐軍餉皆從之明年上弭災

防患八事帝以兵革稍息頗事宴遊盛請復午朝故事立報可當是時帝虛懷納諫凡六科聯署建請多盛與林聰爲首廷臣議事盛每先發言往復論難與議大臣或不悅曰彼豈少保耶因呼爲葉少保然物論皆推盛才擢山西右參政督餉宣府尋以巡撫李秉薦協贊都督僉事孫安軍務初安嘗領獨石馬營龍門衛所四城備禦英宗旣北狩安以四城遠在塞外勢孤奏棄之內徙至是廷議命安修復盛與闕草萊葺廬舍庀戰具招流移爲行旅置煖舖請帑金買牛千頭以賦屯卒立社學置義冢療疾扶傷兩歲間四城及赤城鵬鶚諸堡次第皆完安由是進副總兵而守備中官弓勝害安奏安

疾宜代帝以問盛言安爲勝所持故病今諸將無踰安者乃留安且遣醫視疾已又劾勝卒調之他鎮英宗復辟盛遭父憂奔喪天順二年召爲右僉都御史巡撫兩廣乞終制不許瀧水徭賊鳳弟吉肆掠督諸將生擒之時兩廣盜蜂起所至破城殺將諸將怯不敢戰殺平民冒功民相率從賊盛以蠻出沒不常請自今攻劫城池者始以聞餘止類奏疏至兵部駁不行盛與總兵官顏彪破賊砦七百餘所彪頗濫殺誘者遂以咎盛六年命吳禎撫廣西而盛專撫廣東憲宗立議事入都給事中張寧等欲薦之入閣以御史呂洪言遂止而以韓雍代撫廣東初編修邱濬與盛不相能大學士李賢入濬言

及是草雍敕曰無若葉盛之殺降也盛不置辨稍遷左僉都御史代李秉巡撫宣府請量減中鹽米價以勸商裕邊復舉官牛官田之法墾田四千餘頃以其餘積市戰馬千八百匹修堡七百餘所邊塞益寧成化三年秋入爲禮部右侍郎偕給事毛宏按事南京還改吏部出賑真定保定饑議清莊田分養民間種馬置倉涿州天津積粟備荒皆切時計滿都魯諸部久駐河套兵部尙書白圭議以十萬衆大舉逐之沿河築城抵東勝徙民耕守帝壯其議八年春敕盛往會總督王越巡撫馬文升余子俊徐廷璋詳議初盛爲諫官喜言兵多所論建旣往來三邊知時無良將邊備久虛轉運勞費搜河套

復東勝未可輕議乃會諸臣上疏言守爲長策如必決戰亦宜堅壁清野伺其情歸擊之令一大創庶可遏再來又或乘彼入掠遣精卒進搗其巢令彼反顧內外夾擊足以有功然必守固而後戰可議也帝善其言而止而圭主復套師出竟無功人以是服盛之先見八年轉左侍郎十年卒年五十五賜祭葬諡文莊盛清修積學尚名檢薄嗜好家居出入常徒步生平慕范仲淹堂寢皆設其像志在君民不爲身計有古大臣風明史景泰元年八月也先奉駕還京有匿名帖言迎復事者尙書胡濙持與衆觀不敢陳奏盛曰此野人無情之言達於上感動必矣詔令封進留中明年中書何觀奏王直胡濙

等向附權奸不宜在左右忤旨下勘給事中毛玉屬奏稿罪觀盛曰觀之言雖激中貴怒然其言直上令吾曹議甚盛德也設使雷霆之下豈不成朝廷不容直諫之名且諸君亦言官獨不爲他日計耶玉意解乃爲改奏中數語觀得廷杖調外聞內旨欲起用一久斥之權要盛偕科道具章劾之夜半持詣通政司主者以平安本未進難之盛曰如此本不進當并劾君乃上內旨遂寢撫兩廣時至田州土官岑紹死奴呂趙立紹庶子鑑又殺之立呂氏所畜子爲後盛會兵討之誅趙以嫡子岑鏞嗣田人大悅旌節所至輒訪古碑刻討論故實表章先哲兩廣歸行李蕭然惟碑刻三大篋題曰五嶺奇觀

而已召爲禮部侍郎時值大學士缺上敕吏部尙書王
翱慎簡人入內閣翱薦柯潛劉定之等及盛五人轉吏
部左侍郎後本部尙書缺員盛以資當轉司禮監懷恩
語人曰葉先生名刺朝入冢宰之命夕下矣盛終不屈
乃用尹旻盛喜讀書簿牘戎馬之暇手不釋卷性尤儉
約里居時嘗謁巡撫某於石湖書院巡撫以所乘輿強
盛乘之行經東禪寺託故下輿入寺仍徒步歸迨報謁
盛具盤餐惟雞卵二菜肉各一巡撫出歎曰葉公一清
至此耶今人弗如矣俸賜所入購書萬卷欲作一堂貯
之而力不能世所傳棗竹堂者特虛名耳子晨字廷光
成化丙午舉京兆其舅耿裕爲冢宰或勸其謁選可得

美除不聽未仕卒晨子夢淇以蔭歷大名台州通判衡
州同知清嚴英敏所至有聲盛所遺著述悉捐俸刻之
夢淇子良材歲貢生良材子恭煥

孫瓊字蘊章湘潭令宗子登正統戊辰進士授刑部主事
歷任員外郎中凡十五年於權倖勢要一無畏忌公廉
平恕如一日故事每歲終以通問罪犯類報尙書選諸
郎明慎者重加審錄瓊被選及引對無一人稱寃者江
西安福彭姓泰和龍姓蕭姓挾富貴稔惡邑人奏其不
法事尙書屬瓊往治得實悉寘於法監生王喜爲盜所
攀久繫不決瓊出之喜得祿仕每出署被訊者羅拜馬
首常數十人曰是能直我枉而回我生者也天順中錦

直指揮門達恃寵贖貨多羅織人罪旣抵部諸郎官莫敢異惟瓊多所平反太監牛玉假子犯法囑瓊瓊不少貸由是積怨會故百戶李賓妻杜氏與嗣子剛訟產同曹郎貝某故與杜通以囑瓊瓊不聽爲中分其產貝又令杜鬻其產隱其實剛不平錦衣衛廉得貝事發之辭連瓊以疏放杜氏爲受貝之囑蓋婦人不行禁實遵新例法司不爲辨併貝議罪玉遂乘間中之謫戍遼東瀕行囊橐蕭然僚友釀金爲贖峻卻之成化初復官月餘卽乞致仕隱居三十年未嘗一跡公府三原王恕撫吳嘗過之訪以政事欲盤併餘糧以瓊言不便而止家居事父母以孝稱喪祭極其哀敬每旦必衣冠拜先祠非

疾不廢對客終日無敬側容所居樸陋人不能堪處之裕如也卒年六十八子裕禮禎祐裕字德宏成化乙未進上官武定知州

夏璣字德乾景泰五年進士授應城知縣母喪服闋補新淦淦故富商所集積引錢千計以例請璣笑曰知縣不例悉貯庫備賑富人周某殺人璣寘之獄周賂當道欲出之璣不可未幾調大庾新淦民立祠望思焉徵入爲河南道御史出清軍浙江軍無漏籍民亦不知勾攝之苦照榜期發部檄爲天下御史式以疾告歸杜門簡出日惟養親爲樂璣性善飲在應城嘗醉後撻人母戒之已而母亡遂終身不飲家居四十年未嘗輕入公府親

友以事干謁者峻拒之兄弟三人皆先卒遺孤纍纍同居共爨婚嫁之費皆出於璣自奉簡儉食無重味出無輿馬清修苦節以終邑士大夫題其墓曰純孝先生
陸容字文量祖父三世皆冒徐姓至容始復登成化二年進士授南京吏部主事改北京兵部職方選武庫員外任職方時奉使籍官馬於畿內河南山東諸郡縣還條馬政四事部議允行進職方郎中值邊警章奏日三四上容隨疏條覆動中肯綮海賊劉通流劫廷議發京軍勦之容謂通無遠謀許以不死可一朝定通卒就撫安南侵占城汪直因進取安南之策容言安南臣服已久不當以兵加之西域撒馬兒罕進獅子至嘉峪關乞遣

官迎容謂夷人貢異物當卻不則聽其自至若遣官迎之恐貽笑遠人事皆得寢錦衣百戶韋瑛掩平民劉忠等十餘人誣以妖言械送京師容請詔法司鞠之瑛坐誅先是捕妖言者例授世爵民多誣死容請罷其例宏治初太監李良舉都指揮王欽楊宏乞陞都督已得旨容疏言都督武臣極品不宜授無功并論良等招權市恩罪疏再上竟奪之已又復論八事皆切中時弊而儲台輔惜人才尤剴至尋出爲浙江右參政條列兩浙便宜十事悉見施行後賫表入京論漕渠利病語觸權要以考功法罷歸卒年五十九容孝友性生居兩喪皆三年不處內一弟早死撫孤過已出容沒諸孤持三年服

治家嚴整日必早起盛暑冠服必謹平生耽書籍多著述子伸字安甫隸太倉籍改名坤正德戊辰進士有志行爲逆瑾所誣卒於獄嘉靖初贈大理評事

高敞字德廣成化壬辰進士授禮部主事歷員外郎中再使遼府行冊封禮還賞賚大同將士咸稱職遷順天府丞宏治初畿內大饑請發內帑十萬賑之改應天府丞進府尹政務紛委以次裁決或勸以綜覈者曰吾於事務理其緒急而張之雅非吾志人服其有體年五十七卒同鄉禮部郎管琪籍其囊無以爲殮御史王倬主事王秩相與贖其喪上聞深惜之賜祭葬敝美儀觀襟度疎濶不立崖岸嘗自號強恕弟早卒養其孤寡終身齋

孫世臣隆慶丁卯舉人七世孫祥升以滄樸好善稱

姜昂字恒頰成化八年進士除知棗強縣授御史偕同官劾方士李孜省杖午門外以母老乞改南尋出爲河南知府吏白事畢退闔門讀書鞭箠懸不用藩府人有犯立決遣之改知寧波擢福建參政請終養歸服闋而卒昂在官日市少肉供母而自食菜茹子弟學書不聽用官紙筆家居室不蔽風雨子龍字夢賓正德三年進士歷禮部郎中武宗南巡率同官諫罰跪五日杖幾死出爲建寧同知尋遷雲南副使備兵瀾滄姚安滇故盜藪龍讓土酋曰爾世官縱盜豈非賄乎酋懼撫諭羣盜悉聽命巨盜方定者旣降而貧爲妻妾所誑卒不忍負龍

竟仰藥死南安大盜千人御史欲徵兵龍檄三日散盡
四川鹽井刺馬仁雲南曬江和歌仲讐殺數十年龍撫
諭遂解大侯州土官猛國恃險肆暴龍擒之在滇四年
蕃漢大治鄧川州立三正人祠祀袁州郭紳莆田林俊
及龍明昂任河南時以甄別屬吏爲先劾去吏之不檢
者月三四輩境內肅然在寧波緩刑薄賦與民休息捕
吏不入於鄉鄞縣供億歲且萬金昂取其籍自訂之削
十之七日本使道出四明橫甚一見昂皆不敢動在任
六年政飭民安築無事亭以吟咏寄意家居杜門卻掃
嘗語其家人曰吾受人一財終身屈此人下矣鄞人朱
瑄與昂爲風節交以巡撫都御史泣蘇固求一見竟不

可得

按昂居邑之太倉宏治間分設州治子龍遂隸州籍故選舉志不載

吳瑞字德徵成化乙未進士授南京吏部主事憂歸六年
改補工部出理徐州洪水利商人載酒千艘經徐介故
人饋以金峻卻之陞郎中奉敕督理濟寧以南河道時
濟上水涸急馳至疏故鑿新河流不梗高郵巖社湖風
濤最險瑞以傍湖田鑿復河四十里舟行得安功成而
賦額尙存或議撥荒田補之瑞曰賦荒之害甚於溺上
疏請蠲詔從之以疾歸絕意仕進少以易學起家居官
未嘗一日廢學嘗榜其徐州署齋曰窮經家居二十年
惟以書自課工古文詞求者戶屢恒滿有別業在玉山
西嘗擢小舟看山混跡田夫野老中自號西溪居士所

親子爲人奴贖以金且爲授室晚歲營地於陳墓涇題
曰紫霞堆自爲之志長子蘭宏治己未進士有志操以
分宜知縣擢監察御史客賀之瑞曰宜弔客愕然瑞曰
盛者衰之始父子繼世通顯不太盛耶是吾憂也

秦璫字廷贄少失學旣長代父里役官挫辱之歸卽勵志
讀書舉成化乙未進士授刑部主事爲曹長決事輒當
情法厯員外郎中御史彭程言事繫獄璫疏其無罪臺
省繼奏遂得釋宏治庚戌兩廣巡撫秦紘劾安遠侯柳
景鎮守不法事上命璫往按悉發其奸景懼誣以與紘
有私上命廷臣會問午門外卒抵景法陞貴州副使貴
故羅施鬼國諸苗出沒深林大箐間跳梁爲患璫至諭

以朝廷威福諸苗帖然踰年乞賫捧便遣省母自劾免
家貧枯魚麥飯對客忻然詩文俊逸無塵人傳誦之

吳愈字惟謙凱子成化乙未進士授南京刑部主事厯員
外郎中初凱起家刑曹每爲愈言折獄之道愈在部繙
閱舊牘益精法理一時奏讞咸倚以決出知敘州府敘
故焚地俗獷吏黠愈持以鎮定發摘如神慶符盜劫縣
治捕得二十七人已誣服愈疑之詣縣審釋二十五人
未幾獲真盜土官安鰲以馬湖叛衆議用兵愈曰鰲無
遠謀彼中無水當重圍以困之已忽棄城走衆懼其糾
諸夷爲亂愈曰鰲離巢穴一窮寇耳諸夷皆其仇何能
爲遣人襲之不血刃而獲自是馬湖改置流官後羣夷

復劫府印爲亂愈疾抵其巢諭之遂獻印解散在敘九年遷河南參政兼理屯田先是藩府占匿屯田以千萬計屢詔御史直之彌連不可問愈剗剔鈎校多所釐正有蜚語中之者遂自免歸又二十年卒年八十四愈生平以禮自持雖宴笑融洽而人莫敢慢有女三人歸陸紳文徵明皆名士其一歸王銀司業同祖之父也

王倬字用檢崑山州學正夢聲七世孫成化十四年進士授山陰知縣以憂去補餘干屢決疑獄贛州賊殺信豐令御史檄倬往勦賊據山險倬乘夜驅羊千頭入山縱火噪從之賊懼投木石俱盡比曉破之改知蘭谿宏治乙卯擢南京山西道御史首劾貪污文選郎貢欽罷之

又劾免尙書方面之不職者太監楊某倚使命驕橫至箠擊進士又劾罷之遷貴州副使正德丁卯以例裁改廣東瓊州兵備討崖州千家村叛黎倬數移師期以怠賊猝率兵討之平其巢卽其地奏立守禦千戶所擢雲南按察使尋進廣東右布政使會征臨賀峇克之降其餘衆轉四川左布政使大盜藍鄆流劫迫成都鎮守中官議焚附近民居倬曰是益賊勢也乃開城門嚴兵以待賊不敢近總制彭澤率兵勦餘賊檄州縣課私馬萬計從軍倬匿弗下令各鄉落馬入城避賊其緩而遺馬賊者死馬旣入而後課之數具足澤又檄所司餉熟糧四千石於軍日中爲約倬督市戶分道抵軍日未中而

數已溢進右副都御史巡撫順天屬邑大饑前後奏請
發通倉米十四萬石銀八萬兩賑之全活甚衆值朶顏
寇邊殺參將陳乾鎮巡屯兵馬蘭峪倬策其必乘虛東
入亟調精騎四千爲三覆以待無何果毀東墻入遇伏
敗去進南京兵部右侍郎乞歸卒年七十五倬性仁厚
而練達機警善因事爲功不矯激不詭隨故所至有聞
居鄉以孝義稱嘗割田千畝以贍三族子忬孫世貞世
懋隸籍太倉詳州志兄僑字德高成化乙未進士授武
寧知縣歷山東曹縣皆有德於民陞工部主事遷員外
郎中以老致仕

崑新兩縣續修合志卷二十二終

